

Ciyei du teng a bonggo Matayo Tosugu

Nere wu bala ciyei du teng dina wii Matayo, yo twii nere wu Yudaya, wu wiino a cuḍi kwatimba Yesu wa.

Ciyei du teng a wai Matayo a juḱiya kin Yesu wii Masiya wu nuwa ce ciyei yei a miringgi lakargarindi su dooi, wii yo wu nuwa bu Yudaya wa man nii kin baa wei. A jorondi tum *Ciyei du teng a wai Matayo* a pero a juḱu nyindi su Yesu twanga cewi tu banabindi cei a lakargarindi su dooi. A jukuya kin Yesu twii nere wu duu Ibrahim. A jorondi tum a ce kin Yesu twii <<Boḷ Dawud.>> Yesu a ba yi giru Masiya, cimacima yi ku nuwa bu Yudaya wa lee jire. Anda kana yiṭo ciyei du teng dina kingga bu yigi buru wang a bonggo nuwa bu Yudaya wa. *Ciyei du teng a wai Matayo* juḱiya kin, Yesu Masiya baa dingin nuwa bu siṃa wa mwa mwa, nuwa bu Yudaya wa yi pma bu yaa yoogi nuwa bu Yudaya wa. *Ciyei du teng a bonggo Matayo* a ba juḱiya dak kin Yesu twii kulum wu gira wu kangge wu jukugu yiri you yi cewi yei a juḱiya kin woo yi dimbir wang, a gwala Musa.

A miringgi *Ciyei du teng a wai Matayo* nuwa cwaanga yiring tu Yesu juḱiya yi tu ningai a nuwo. Tu gawuri yei, Yesu a juḱi yiri a dwii cingu, a dwii nyindi su daa yei nuwa Yamba ba ninga songma yi tonoi (Pendi 5-7). Jukugi yiri a

dwii nere wu dee ciyei a dwii Yesu ning wei wurai yei (Pendi 8-12). Goro yito woo yi balanggu ciyei wundu wundu a dwii Lau Yambau (Pendi 13-17). Tu nii yei dong a juki ninga wu daaya nuwa bu pongguwa ba ninga (Pendi 18-23). Tu cwata goroi a juki tu ningdu wei a daandi su cwata goroi, (Pendi 24-25.)

Yiriing tu miriinggi yei

Bir Yesu yi pu twiwe 1:1-2:23

Wasigu ciyei Yohanna wu Ning Batisima 3:1-2

Batisima Yesu yi cuugu you 3:13-4:11

Wurangi Yesu a sima Galili 4:12-8:35.

Yesu duwe sima Galili a baa sima Wurcalima.
19:1-20:34

Wurangi Yesu tu cwata goroi a Wurcalima
21:1-27:31

Piinggu Yesu a yeu yi boori Ye 27:32-66

Wunggu Yesu boore yi juku buri yei nuwa
28:1-20

Dinendi kaka Yesu wa

¹ 21Tina kuçi kaka Yesu Masiya wa, * wu twii kaka Dawud, wu yoogi kaka Ibrahim.

² Ibrahim twii mbaa Icaku,

* **1:1 1:1** Masiya: Din Masiya nuwa yiri mwaasi kin Kristo. Kristo too nyan Elina wa, pitindi din yei twii nere wu nuwa parman yo nunggu a dwii. Nang a bonggo nuwa bu Yudaya wa pma parman nere wii nunggu a dwii dingin ba jukuya kin twii nere wu Yamba seka dingin ba yo balaa. A jor du Yamba ninga alkawal kin yo tumo wei nere mirima, dingin ba baa, ba mira nuwa ya, pero ba de pma lau Yambau, nere wu Yamba tumo wei wii nuwa yiri kin Masiya. Pero din yei Kristo. A jukuya Yamba seka yo, pero tumwe.

- Icku mbaa Yakubu,
 Yakubu mbaa Yahuda yi ciyamba ya,
³ Yahuda mbaa Perisa yi Serah wu njaa pmo
 wii Tamar,
 Perisa mbaa Esrana,
 Esrana mbaa Aram.
⁴ Aram mbaa Amminadab,
 Amminadab mbaa Nacon,
 Nacon mbaa Salmon,
⁵ Salmon mbaa Boasa wu njaa yo wii Rahab,
 Boasa mbaa Obed wu njaa yo wii Rut,
 Obed mbaa Jesse,
⁶ Jesse mbaa balaa Dawud.
 Dawud twii mbaa Solomon, wu njaa yo nang
 twii nure Uriya,
⁷ Solomon mbaa Rehoboam,
 Rehoboam mbaa Abija,
 Abija mbaa Asa,
⁸ Asa mbaa Jehocapat,
 Jehocapat mbaa Joram,
 Joram mbaa, Ussiya,
⁹ Ussiya mbaa Jotam,
 Jotam mbaa Ahas,
 Ahas mbaa Hesekiya,
¹⁰ Hesekiya mbaa Manassa,
 Manassa mbaa Amon,
 Amon mbaa Josiya
¹¹ Josiya mbaa Jekoniya yi ciyamba ya, a jor
 du nuwa kura pma kewuri Babila.
¹² Goro kewuri pmai a Babila,
 Jekoniya mbaa Ceyaltiyal,
 Ceyaltiyal mbaa, Serubabel,
¹³ Serubabel mbaa Abiud,

Abiud mbaa Eliyakim,

Eliyakim mbaa Asor,

¹⁴ Asor mbaa Sadok,

Sadok mbaa Acim,

Acim mbaa Eliyud,

¹⁵ Eliyud mbaa Eliyasar,

Eliyasar mbaa Matan,

Matan mbaa Yakubu,

¹⁶ Yakubu mbaa Yusupu bwiya Maryamu,
wu bi Yesu wu nuwa yiri kin Masiya.

¹⁷ Dingin tono toso bonggo Ibrahim bee
bonggo Dawud twii kakaa kwap sur nii, pero
toso bonggo Dawud bee jor du mwatanga Babila
twii kakaa kwap sur nii, pero toso jor mwatangu
Babila bee jor Masiya twii kakaa kwap sur nii.

Bir Yesu Masiya

¹⁸ Tina nyinou wu nuwa bi Yesu Masiya. Njaa
yo Maryam ninga leengi laabwiya yi Yusupu, pu
boo de bu yo a nyingga woo yi rwii a bonggo
Bawei du Walwal.

¹⁹ Anda Yusupu twii nere wu nyaa yaa kasi ba
dwiiyanga yo melma cudu nuwai, a kasa ba man
yo tukugi.

²⁰ Anda pu woo danggu yito, bacama Mbaa
Wu Gira a bammanuwe yo a miringgi dweendi
kin, <<Yusupu bol Dawud, nuu yaa gwasi degu
Maryam ba yoo nure mo, dingin tu miringgi
pwii yei too a baa bonggo Bawei du Walwal.

21 Yo biru wei bwiya, ma jee ru wei din min Yesu,† dingin yo miru wei nuwa ya bonggo welemdi pmai.>>

22 Mwa mwa too a ningwa palaka ba twanga tu Mbaa Wu Gira ce a bonggo banabi kin,

23 <<Bweecanga ning wei rwii, pero biru wei bwiya, nuwa yiri wei din yei kin Immanuwel,>> pitindi yei kin, <<Yamba woo kem yi yo.>>

24 Pu Yusupu romwa, a ninga tu bacama Mbaa Wu Gira sa yo, a dee Maryam ba yo nure yo.

25 Anda yaa ku daa yi yo, kopo jor du bi bol yei. Pero a jee din kin Yesu.

2

Bagu kulumba bu som yiri a dwii bajwari wa

1 Goro pu nuwa bi Yesu a Baitalami a sima Yudaya wa a jor du Balaa Hiridus jeegi lau, nuwa bu kangga twiyongo donome bu som yiringi a dwii bajwari a baanga Wurcalima

2 a pira kin, <<Pu nuwa bi balaa wu nuwa bu Yudaya wa a piyau? Yi ko bajwali yo a donome yi baanga dingin yi kuraman yo sima.>>

3 Pu balaa Hiridus nuwa yito, gaanggu you bwiiwa kem yi nuwa bu Wurcalima wa mwa mwa.

4 A yiwe bagiraa kuruwa wa yi kulumba teeringi wa, a pira pma pu nuwa biru wei Masiya.

† **1:21 1:21** Yesu too din Elina wa cika Jocuwa yi nyan Yudaya wa pitindi yei twii Mbaa Wu Gira wu yi mirma

⁵ Pma leeman yo kin, <<A Baitalami sima Yudaya wa, dingin tina tu balgi miringgi lakargar banabi kin,>>

⁶ <<Anda mo Baitalami bu sima Yahuda wa, ma yaa yoogi wu banyina miringgi lauri tu Yahuda, a miringgi mai balaa twiwe wei, wu yoo wei taage nuwa muwa Israila.>>

⁷ Anda Hiridus yiwe kulumba bwii tukugi ba pira jor du bajwale wii twiwe.

⁸ A tum pma Baitalami a sa pma kin, <<Ambira bu kasa pu nuwa bi bwiya wii. Ka bu nyinggi ba bu sangge palaka mi mwa n angge n kuraman yo sima.>>

⁹ Goro pu pma nuu balaau, pma taa nyinou, bajwale wu pma ko a donome wii a songma gawur pmai ba tin tiyei pu nuwa bi bwiya wii.

¹⁰ Pu pma ko bajwale wii pma twangwa yi buri degdeg.

¹¹ Pma teendo laa wii a ko bwiya wii kem yi njaa yo Maryam, anda pma kundi kwiyei kuraman yo sima. Pero pma pera swarindi pmai a nyii nii sinariya yi turale wu teng yi nyinou ku nuwa yiri kin mirr.

¹² Nuwa ningaman pma dikacene a miringgi dweendi ba pong yaa bonggo Hiridus, pma pong nyinou wu kanggu a waatanga buri sima pma.

Yusupu yi nur yo ceendo Masar

¹³ Pu pma mwatangu, bacama Mbaa Wu Gira baa bonggo Yusupu miringgu dweendi, a see kin. <<Wuni ma de bwiya woo kem yi njaa yo ma amna Masar. Ma sin siyei pwii kopo jor du sa

minai, dingin Hiridus kasi wei bwiya woo ba ji yo.>>

¹⁴ Bur a wuni a de bwiya wii yi njaa yo yi kum wii a mwati Masar,

¹⁵ a sin siyei pwii kopo jor du Hiridus bwaa. A ningwa yito palaka ba twanga tu Mbaa Wu Gira a ce nyan banabi kin, <<N yiwe bol mi a Masar.>>

¹⁶ Pu Hiridus kuranga kulumba bwii welenga yo, a suko kwang kwang, a diina nuwa ba laca bakor nambirmba bu Baitalami yi gorondi tu worigi yo bu mila rop yi bu mildi pmai dwalna wa, cuungi jor du kulumba sa yo labar wii.

¹⁷ A jor dwii yiri tu banabi Irmiya cei a twangwa.

¹⁸ <<Nuwa nuu miu a Rama, wiindi yi bwiyang gaangu wang Rahila wiindi dingin kwaraa ya a kwaa kin nuwa ba doromini ya dingin pma yaa mere.>> *

Yusupu yi nur yo waatanga Nasaret

¹⁹ Goro pu Hiridus bwaa bacama Mbaa Wu Gira bammanuwe Yusupu miringgi dweendi a Masar

²⁰ a ce kin, <<Wuni ma de bwiya woo kem yi njaa yo, ma amna sima Israila, dingin nuwa bu kasigu jigu bwiya woo wa, a bwaanga.>>

²¹ Dingin tono a wuni, a de bwiya wii kem yi njaa yo a aara sima Israila.

²² Anda ku nuwa kin Arkilawus jeegi lau a Yudaya a candu mbaa yo Hiridus, a nuu gwasi

* **2:18 2:18** Irm. 31:15

ba aara pwii. A aara si_{ma} Galili yake_{ku} nu_{wa} ni_{ng}aman yo di_{kac}ene_a dwe_{endi}.

²³ Anda a aara si_n siye_i a gwe_i du nu_{wa} yir_i ki_n Nasaret. Too a ni_{ng}wa yi_{to} di_{ng}in ba twanga tu banabi_{ndi} ce_{kin}, <<Nu_{wa} yir_u wei_{kin} Nasarin.>>

3

Yohanna wu Ni_{ng}i Bati_{si}ma me_{ne}nga nyinou

¹ A swii daandi Yohanna wu Ni_{ng}i Bati_{si}ma a baa, a wasigu ciye_i a gu_{lai} Yudaya,

² a ce_{gu} ki_n, <<Bu ni_{ng}a bwiiwa bonggo wele_{mdi} mbiri, di_{ng}in lau_{ku} diyou a ni_{ng}a nem.>>

³ Yohanna wii yo wu banabi Icaya ce ciye_i a dwii ye_i, pu ce_{kin},

<<Miu ku yig_u yir_u a miri_{ng}gi gu_{lai},
Bu carman nyinou Mbaa Wu Gi_{ra},

Bu curman nyindi ye_i tek!>>

⁴ See Yohanna me_{ne}nggi yi ku_{ri} nggelai, bogi pi_i yi bi_{yau}, je_{endi} ye_i twii juwai yi niyari.

⁵ Nuwa tum a twiyongo Wurcalima, yi Yudaya, yi go_{ron}di mwa mwa tu nem yi you ku Urdun a aanda bonggo you.

⁶ Pma ni_{ng}gu bwiiwa bonggo wele_{mdi} pmai, a ni_{ng}aman pma bati_{si}ma a you Urdun.

⁷ Pu Yohanna ko Parisayo yi Sadukayo bagu bonggo you di_{ng}in ba ni_{ng}aman pma bati_{si}ma, a sa pma ki_n, <<Mba coog_{indi} su bwii wu sambira ki_n bu cembir bal Yambai su so_o baa we?>>

⁸ Bu ni_{ng}a ni_{ng}andi tu ju_{ku}ru wei_{kin} bu ni_{ng}a bwiiwa a bonggo wele_{mdi} mbiri.

⁹ Anda bu danggi ya a gaanggu mbiru min Ibrahim twii mbaa mbire. N woo sagumbiru Yamba woo yi dimbire ba waata swaringi tina ba yo kwaraa Ibrahim!

¹⁰ Nuwa gicila cenni nyan cunau a pii sou, kana kono sou ku twiya bu tutwiyari tu nyaayi buri nuwa ba kaca ba manna bwalau.

¹¹ <<N ningambiri batisima yi gundu ba jukuya kin bu ninga bwiiwa, anda wu kangge woo baa goro mu ninga mbiru wei batisima yi Bawei du Walwal yi bwalau. Yo gwalangge yi giru, n yinnibu kana paari yei n de.

¹² Yo tagi kaa tena yo yetu wei jama ya, pero ba kuranga goma ya, ba tena bindou you, anda taaru wei pudi yei yi bwalau ku yaa dumdu.>>

Yohanna ningaman Yesu Batisima

¹³ A dwii jore Yesu duwe sima Galili a baa you Urdun dingin Yohanna ba ningaman yo batisima.

¹⁴ Anda Yohanna kwaa, a see kin, <<A daaya mo, ma ningangin batisima, dingin ca ma bagu bonggo mu?>>

¹⁵ Yesu leeman yo kin, <<Yama ba ningwa yito. Dingin tagi yi twanga tu Yamba kasi.>> Bur Yohanna a lee.

¹⁶ Pu nuwa ningaman Yesu batisima, twiigu gundu kwii, kinangu, bur diyou wum buri, a ko Bawei Yamba julomanuwe cika bamolo a tina dwii yei.

¹⁷ Bur miu twiwe diyou kin, <<Ma Bol mi, wu n kangne, n ningi buri degdeg yi mo.>>

4

Cuugu Yesu

¹ A dwii jore Bawei du Walwal a de Yesu gulai palaka Balaa Buwai ba cuu yo.

² Goro pu ninga daa kun nii kume yi nyanggu yaa tu jei, Yesu nuu june.

³ Bur Balaa Buwai baa bonggo you a see kin, <<Ka ma yoogi Bol Yamba wei diin swaringi too ba waka buri, ba yoo kumaa.>>

⁴ Anda Yesu leeman yo kin, <<Lakargar Yamba ce kin, <Nere na yili yi kumaa yi wundu, anda yi kana dono ciyei du baa bonggo Yamba.>>>

⁵ Pero Balaa Buwai a de Yesu Wurcalima, gwei du walwal, a cenna pu dekerger Laa Yambau,

⁶ a sa yo kin, <<Ka ma yoogi Bol Yamba wei, yarwe poo, dingin balgi miringgi lakargar Yamba kin, <Yamba nyii wei bacamandi yei teere a dwii mai,

pma kangaminu wei a war pmai, dingin ma buni ya kana namau a swelei.>>>

⁷ Yesu leeman yo kin, <<Lakargar Yamba a ce kin, <Ma cuu ya Mbaa Wu Gira Yamba mo.>>>

⁸ Bambang Balaa Buwai de Yesu a cingu ku getengteng a juku yo lauri tu simai yi yilau yau mwa mwa.

⁹ Balaa Buwai see kin, <<N nyiiminu wei tina yiringi mwa mwa ka ma kun kwiyei ma kurangin sima.>>

¹⁰ Yesu leeman yo kin, <<Mwati poo Balaa Buwai! Lakargar Yamba ce kin, <Ma nyii giru Mbaa Wu Gira Yamba mo, ma kuraman yo sima yo wundu.>>>

11 Bur Balaa Buwai a du Yesu, anda bacamandi baanga pma kalanga yo.

Yesu toso wurai yei a Galili

12 Pu Yesu nuwa kin nuwa manni Yohanna a jarum, a aara sima Galili wa.

13 Yo yaa ku si siyei Nasaret anda a mwati si siyei a gwei Kaparnahum, gwei du nem yi kalinggu ku Galili, a sima Sabulun yi Naptali.

14 Too yiri ningwa yito palaka ba twanga tu banabi Icaya cei.

15 <<Sima Sabulun yi sima Naptali,
a nyinou wu aari kalinggu, ku yero you
Urdu,
yi Galili, sima nuwa bu yaa yoogi nuwa bu
Yudaya wa!

16 Nuwa bu pisindi pu rim wa
kwee wei rangu wu girau.
Pma bu pisindi sima bu yi kumjila booru wa,
Rang swii pma.>>

17 Toso dwii jore Yesu toso wasigu ciyei yei,
<<Bu ninga bwiiwa bonggo welemdi mbiri
dingin lau ku diyou ninga nem!>>

Yesu yi kwatimba ya bu gawuriyo wa

18 Pu Yesu woo songma ging kalinggu ku Galili,
a ko nuwa rop ciyamba buri twii nuwa bu ree
jindu wa, Simon wu nuwa yiri kin Bitrus yi ciya
yo Andarawus, a regu jindi a kalinggu yi lemu.

19 Yesu sa pma kin, <<Bambe bu pongge, n
juku mbiri wei regu nuwau.>>

20 Yoko yoko pma du lemdi pmai, a pong yo.

21 Yo jee gawure a ko bu kangga rop ciyamba
buri, Yakubu yi Yohanna, kwaraa Sabadi wa.

Pma miringgi konggoru kem yi mbaa pmo Sabadi, pma menenggu lemdi pmai. Yesu yiwe pma,

²² pma duu konggoru wii mbaa pmo, yoko yoko pma pong yo.

Yesu mira nuwa bu yi buwangi wa

²³ Yesu wora Galili, a jukugu yiringi nuwa a girindi kuri pmai, a wasigu ciyei du teng a dwii lau Yambau, pero a mira nuwa bu yi buwangi wundu wundu yi buri wulok wa pma yilanga.

²⁴ Labar yo wasi buri sima Siriya wa mwa mwa, dingin tono nuwa ninga pu demuwe yo nuwa mwa mwa bu yi buwangi wundu wundu wa bu cusangu bonggo buwangi wundu wundu yi bu buri mwaanga buru wa, nuwa bu yi wuturindi wa yi bu yi toki wa, yi bu buri borgi wa Yesu mira pma mwa mwa a yilanga.

²⁵ Nuwa tum pong yo, toso sima Galili yi sima bu yi Gorondi Kwap wa, yake Wurcalima, yi Yudaya yi sima bu donome yi Urdun wa.

5

Wasigu ciyeu a cingu

¹ Pu Yesu ko nuwa tum kuranga buri a geero cingu, a sin siyei. Kwatimba ya kuranga buri worigi yo,

² anda a toso pirgu pmau.

³ <<Wuure bonggo pma bu som dwal pmai du bawei,

lau ku diyou kwii kopinau!

⁴ Wuure bonggo pma bu yi bwiyanggu gaanggu wa,

Yamba diramanu wei pma gaanggu!

⁵ Wuure bonggo pma bu yi cingon dwiu wa,
pma kinggu wei sima!

⁶ Wuure bonggo pma bu nuu jun ninggu pisu wu
nyaau a gawuri Yamba,
Yamba yaminu wei pma biiki pmo gekrek!

⁷ Wuure bonggo pma bu nuu bunam bu kangga,
Yamba nuu wei bunam pmau!

⁸ Wuure bonggo pma bu yi gaanggu walwal,
pma kwee wei Yamba!

⁹ Wuure bonggo pma bu teçi naapu wa,
Yamba yiru wei pma kin kwaraa ya!

¹⁰ Wuure bonggo pma bu nuwa turongo pma
dingin ninggu pisu wu nyaau a gawuri
Yamba,
lau ku diyou kwii ko pmau!

¹¹ <<Wuure bonggo mbiru ka nuwa
rweembiri, turo mbiri pero ciyei kana konu duu
yiri tu bwii a dwii mbiri kin dingin bu ponggu
mu.

¹² Bu ninga buri degdeg yi dirang gaanggu,
dingin woriri mbiri tum a pwii diyou. Too tu
ningaman banabindi su gawuri yi mba.

Bimakwana yi rangu

¹³ <<Bu yoogi bimakwanaa nuwa mwa mwa.
Anda ka bimakwanaa cwaani buri yi teng you,
nuwa puunu wei teng you kwii nye? Yo ninga
kwecekewece, bur nuwa ba par siyau sima ba
peenga.

¹⁴ <<Bu yoogi rangu wu sima mwa mwa. Gwei
du mogi dwii cingu yaa tukuri.

15 Yaa nere wu kucin bwalau kendabwala ba summo yi takale, anda nuwa cenni pu dekerger, dingin ba nyii rangu kana we wu laa wii.

16 Yito mwaasi rang mbiru ba swii buri bonggo nuwau, palaka ba ko wurangi mbiri tu nyaayi tu bu ningi, ba terenga Mbaa mbire wu diyou.

Pirgu yiringi a dwii teere

17 <<Bu dangani ya min n baa palaka n woo siyei Teere Musa yi yiring tu banabindi balai. N baa bu n woo siyei, anda n twanga.

18 N woo sagumbiru jire kopo ka diyou yi sima woori buri, kana gon ciyei diino, kana jokugu ku banyinau, yaa ku woo wej buri miringgi Teeringi Yambai kopo ka yiringi too mwa mwa ningdi buri.

19 Dingin tono kana we wu paa teere diino du banyina a miringgi teeringi, pero pir bu kangga ba ninga yito, yoo wej wu banyina a lau ku diyou, anda kana we wu ponga pero piryo yoo wej wu gira a lau ku diyou.

20 N woo sagumbiru jire, ka pisu mbir wu nyaau a gawuri Yambau gwala bu kulumba teeringi wa yi Parisayo ne, bu tembir lau ku diyou.

Pirgu yiringi a dwii sukom

21 <<Bu nuu tu Yamba sa kakaa yiwa nang kin, <Ma jiri ya nere, kana we wu ninga, nuwa ningamanu wej yo bali.>

22 Anda n woo sagumbiru min: Kana we wu suko yi bagon yo nuwa ningamanu wej yo bali, kana we wu yi bagon yo kin, <Ner wu nyo,> nuwa der wej gawuri bagiraa nuwa bu Yudaya

wa, pero kana we wu yi bagon yo kin bapime yannu wei par bwalau.

²³ Ka ma wuni nyiigu nii Yamba a kwaare anda ma danggi min bagon mo woo yi yiri yi mo,

²⁴ ma du nii mai a gawuri kwaare, ma mwati ma nuwanga bagon mo anda ma waata ba ma nyii nii mai Yamba.

²⁵ <<Ka bacen mo der kwaram mo a gireng balu, kasa bu nuwanga jor du bu boo nyinou, pu bo bu laman bu laa balu. Ka yito ne deminu wei bonggo nere wu ning bali, wii yo wu deminu wei bonggo bagiraa, pero nuwa manminu wei jarum.

²⁶ N woo sagumbiru, yaa ku ma twii wei pwii, kopo ka mo yar kana ca tu nuwa mwar minai.

Pirgu yiri a dwii taari

²⁷ <<Bu nuu tu Yamba ce kin, <Ma ningi ya taari.>

²⁸ Anda n sagumbiru min, kana we wu suwa nure yi miyam a gacila ninga taari yi yo a gaangu.

²⁹ Ka nung mo wu jeu diimini wei welem wei, ma yikiyo ma man siyei! Kujang ma yaa bonggo wu kangge a buri mai yiku buri mai mwa mwa nuwa manminu wei bwalau ku yaa dumdu.

³⁰ Ka wai mau wu jeu diimini wei welem wei, ma mwariya ma man siyei! Kujang ma yaa bonggo wu kangge a buri mai yiku buri mai mwa mwa nuwa mannu wei bwalau ku yaa dumdu.

Pirgu yiringi a dwii jigu laabwiya.

31 <<Cegi kin, <Kana we ka man nure yo kopo ka nyii lakargar jigu laabwiya.>

32 Anda yoko n woo sagumbiru min, kana we wu man nure yo, yaa dwii taari ne, a diina nure yo ba ninga welem taari, pero kana we wu yiki nure wu nuwa mana a ninga taari.

Pirgu yiringi a dwii wera

33 <<Pero bu nuu tu Yamba sa kakaa yiwa nang kin, <Ma kiyani ya wera mo, anda ma ninga tu ma weranga gawuri Mbaa Wu Gira.>

34 Yoko n sagumbiru, bu ningi ya wera a dwii kana ca. Bu wereni ya yi diyou, dingin twii candu Lau Yambau

35 kana yi sima pu cenni mwar yei, kana yi Wurcalima, dingin twii gwei Balaa wu Gira.

36 Bu ningi ya wera kana yi dwii mai, dingin bu puwi wakugu kana kuu kuri kiino polo polo kana pitipiti.

37 Yama <Ong,> mbire ba yoo <Ong,> pero <<Ang Ang,>> mbir ba yoo Ang Ang.> Kana ca tu bu ce ka gwal yito a baa bonggo wu bwiiye wii.

Pirgu yiringi a dwii yagu gerou

38 <<Bu nuwa cegi kin, <Nunge nyan nunge, pero nwii nyan nwii.>

39 Anda yoko n sagumbiru min, ma yari ya gerou bonggo nere ning tu bwii. Ka wu kangge kapa mini dwang mo wu jeu ma wakaman yo wu kanggi wii mwaasi.

40 Ka nere wu kangge kasi der kwaram mo a laa balu palaka ba yiya min cacuwe mau, ma murman yo gatangamau mwa.

41 Ka kana we kica min songma nyan mel wiino ma amna nyan mel rop.

42 Ka kana we ka senggı yiri bonggo mou, ma puwa yo, ma jari ya nere wu baa kasıgu cine bonggo mou.

Ma kangman bacemba ma

43 <<Bu nuwa cegi kin, <Ma kangman bapun mo, ma kwaa bacen mo.>

44 Anda yoko n sagumbiru min, bu kangman bacemba mba, bu ceman pma kuru pma bu turo mbir wa,

45 palaka bu yo kwaraa Mbaa mbir wu diyou. Dingin yo diini nyanggu swiiri nere wu bwiiye yi nere wu nyaa, pero diini gundu yar man nere wu ning pisu wu nyaau a gawuri Yambai yi pma bu yaa ning pisu wu nyaau a gawuri Yambai.

46 Ka bu kangman nuwa bu kang mbiri wa tibak, woriri yei ca tu bu king wei? Kana nuwa bu yiri janggal wa mwa, ning yito!

47 Anda ka bu cir basimba mba tibak, tu bu ninga tweeyei ca? Kana nuwa bu som bu Yamba wa ning yito!

48 Tagi bu siya cimacima cika ku Mbaa mbire wu diyou cimacima.

6

Nyingu nii bu yaa tonowa

1 <<Bu ruun tuwe, bu ningi ya wurangi tu nyaayi min palaka nuwa ba ko. Ka bu ning yito yaa ku bu nyingu wei woriri bonggo Mbaa mbire wu diyou.

² <<Dingin yito ka bu nyii yiri nere wu yaa tono bu teeri ya, cika ku nuwa bu yi batal wa ningu a miringgu girindi kuri yi nyindi. Pma ningi yito palaka nuwa ba wandi pma. N woo sagumbiru jire pma nyingga woriri pmai.

³ Anda ka bu kalan nere wu yaa tono, kana basin mo wu nem ba som ya,

⁴ palaka nii mai ba yoo tukugi. Mbaa mo wu kweeyi tu tukugi nyiiminu wei woriri.

Pirgu yiringi a dwii cegu kuru

⁵ <<Ka bu wuni cegu kuru bu ningi yaa cika nuwa bu yi batal wa! Pma kasi ba ce kuru a pitindi a girindi kuru yi gengelte nyindi, palaka kana we ba ko pma. N woo sagumbiru jire, pma gicila nyingga woriri pmai mwa mwa.

⁶ Anda mo, ka ma wunni cegu kuru, ma dimno kane, ma laka nyinou, ma ce kuru bonggo Mbaa mo wu nuwa yaa kweeyi. Mbaa mo wu kweeyi tu tukugi nyiiminu wei woriri.

⁷ <<Ka bu wunni cegu kuru bu ningi ya pu perenggu, cika ku nuwa bu som bu Yamba wa ningu, pma nuu cika Yamba nuu wei pma dingin cewi pmai tu cokurok.

⁸ Bu ning ya yito dingin Mbaa mbire a som tu bu kasigi yake pu bo bu senggo bu yo.

⁹ Tina nyinou wu bu ce wei kuru:

<<Mbaa yire wu woo diyou,
nuwa ba nyii giru din mai.

¹⁰ Lau mou ba baa,
dangandi mai ba ningwa sima,
cika ku ningu buru a diyou.

¹¹ Ma puu yir jeendi tu reni.

12 Ma para sukom welem yiru,
 cika ku yo mwa yi paraman sukom
 pma bu wele yiru wa.

13 Ma de yiri ya bonggo miyam,
 anda ma mira yiro bonggo wu bwii wii.

14 <<Ka bu par sukom pma bu ninga mbir
 welem wa, Mbaa mbire wu diyou yika mwaasi
 para mbir wei sukom welem mbiru.

15 Anda ka bu kwaa pargu sukom pma bu
 wela mbir wa, yito mwaasi Mbaa mbire yaa ku
 para mbiru wei sukom welem mbiru.

Pirgu yiri a dwii degu cooji

16 <<Anda ka bu der cooji, bu bwiyani ya
 gaanggu cika nuwa bu yi batal wa. Pma caari
 kau palaka kana we ba ko kin pmai degi cooji. N
 woo sagumbiru jire pma gicila nyingga woriri
 pmai mwa mwa.

17 Anda ka ma der cooji ma car kau mau, ma
 swati dwii mai,

18 dingin nuwa ba som ya kin ma degi cooji
 buri Mbaa mo, wu nuwa yaa kweeyi, yo som
 wei. Anda Mbaa mo, wu kweeyi tu tukugi
 nyiiminu wei woriri.

Nyaa ku diyou Yambau

19 Ma ruumani ya buri mbiri gina a sima, pu
 bobo yi saasa bwianu wei, pero kuuwa kinggu
 wei nyinou ba jinda.

20 Anda bu ruu man buri mbiri gina diyou
 Yambau, pu bobo yi saasa na bwiyani, pero
 kana kuuwa na pu repugu ba jinda.

21 Dingin pu gina mo woo miru, gaanggu mou
 koo pwii.

Rangu buru

22 <<Nundi twii kendarwala buru. Ka nundi mai kundi wang, mwa mwa buri mai twanggi yi rangu.

23 Anda ka nundi yaa kundi ne, buri mai mwa mwa si wei yi kumjila. Dingin tonoka rang wu buri mai twii kumjila wei, kumjila wu ma miri wang!

Yamba yi gina

24 <<Yaa nere wu kuramanu wei sima nuwa bu girawa rop, ma kangmanu wei wiino, ma kwaa wu kangge. Ma cedo wu wiino, ma pong wu kangge. Yaa ku ma kuramanu wei sima Yamba bambang ma kuramanu sima kene.

25 Dingin tonon woo sagumbiru, bu miyani ya buri yi piima mba, yi yiri tu bu jee wei yi tu bu naa wei, kana see wu bu teeru wei a buri. Piima gwala bu jeendi ru? Buri gwala bu see ru?

26 Bu suwa yidi, pma yaa piri yaa kaci, pero yaa gamani ba parna bindou, anda Mbaa mbire wu diyoyu pu pma jeendi! Bu gwala bu yidi kwaara ru?

27 Wii we a cudu mbiri dingin miyanggu buru puu wei cwatugu kana daa kiino a miringgi daa yo?

28 <<Anda dingin ca bu miyani buru dingin see? Bu suwa pundi tu gulai giri, yaa pu ninggu kana ca dingin buri pmai, yaa pu ba ninga waandi dingin buri pmai.

29 Anda n woo sagumbiru kana Balaa Solomon yi gir you mwa ninga bu waandi sii yilau cika tono.

³⁰ Ka cembere Yamba pu ningaman sii tu gulai waandi tu too reni anda punge nuwa parnu wei bwalau, dwiyaman mba tee mbiru wei see, mba bu yi dwal leegu jire.

³¹ <<Dingin tono, bu miyani ya buri, bu cegu min, <Tu yi jee wei ca? Tu yi naa wei ca? Tu yi teeru wei ca?>

³² Nuwa bu pma som bu Yamba wa, a kasangu too yiringi mwa mwa, Mbaa mbire wu diyou a som biiki mbire.

³³ Anda tu gawuriyo, bu kasa lau you yi pisu wu nyaau a gawuri yei, anda yo nyiimbiri wei too yiringi mwa mwa.

³⁴ Dingin tono bu miyani ya buri yi punge, punge a yi biiki yo. Kana kono nyangu yi biiki yo.

7

Bu ningamani ya nuwa bali

¹ <<Bu ningamani ya bali nuwa, palaka Yamba ba ninga mbir ya bali,

² dingin Yamba ning mbir wei bali yito cika ku bu ningaman bali nuwa. Yi bosoro wu bu cuuman nuwa yi tono, Yamba cuu mbiri wei yi tono.>>

³ Dingin ca mo suugu bosiyau ku nung bagon mou, anda ma yaa kogu gulsou wu nung mou?

⁴ Ningdu wei nye ma sa bagon mo min, <Yama n deman bosiyau ku nung mou,> anda mo yiri mai ma wo yi gulsou a nung mo?

⁵ Mo wii batal, ma toso demangu gulsou wu nung mou bati, palaka mo kwee wei sima kundi, ma podoman bagon mo bosiyau ku nung you.

⁶ <<Bu nyii ya bairi yiri tu walwal. Ma mandii ya siyei gisi tu yi pircu a gawur bakambi su lai, pma penu wei yi mwari pmai! Anda ba waata bonggo mou ba pwara mina.

Ma celo, ma kasa, ma kupo

⁷ Bu ninga pu celo, nuwa nyiimbiri wei. Bu ninga pu kasigu, bu nyingu wei. Bu ninga pu kupugu, nuwa wunmbiru wei.

⁸ Dingin kana we wu celo, nuwa nyii wei. Kana we wu kasa, nyingu wei, pero dong kana we wu kupo, nuwa wunmanu wei yo.

⁹ Mba kwiimba, wii we a cudu mbiri wu ka bol yo cel yo kumaa, nyii wei swel?

¹⁰ Pero ka cel yo jingne, nyii wei coogu we?

¹¹ Ka mba bu bwiiwa bu som nyiigu tu nyaayi kwaraa mba wei, dwiyamin Mbaa mbire wu diyou, yo nyii wei yiringi tu nyaayi nuwa bu sengu yo wa!

¹² Dingin tono, cika ku bu kasi nuwa ba ningambira, yito mwa bu ningaman pma, too pitindi teering Musa yi banabindi.

Nyinou wu lepek yi wu gurcik

¹³ <<Bu tembiro nyinou wu gurcik. Dingin nyinou wu lepek der nere par bwalau, pero nuwa tum teendi.

¹⁴ Anda nyinou wu banyinau pero gurcik twii nyinou wu der nere piima, anda nuwa banyina tibak kinggi.

Bu som wei nuwa bonggo wurangi pmai

¹⁵ <<Bu ruun tuwe bonggo banabindi leendi wa. Pma baanga wei bonggo mbiru a miringgi

biyau cika puuri, anda a miringgi pmai twii geppindi.

¹⁶ Bu kuranu wej pma bonggo tutwiyari pmai. Yaa ku nuwa war wej tutwiyari inabi a bonggo kurille, yito mwa yi pwaari pwalgu a bonggo sou calau.

¹⁷ Yito mwaasi yi kana kono sou ku nyaau nyii tutwiyari yei, anda sou ku bwii nyii tutwiyari tu bwii.

¹⁸ Sou ku nyaau yaa nyii tutwiyari tu bwii. Yito mwa sou ku bwii yaa nyii tutwiyari tu nyaayi.

¹⁹ Kana kono sou ku yaa nyii tutwiyari tu nyaayi nuwa kacinu wej sima ba manna bwalau.

²⁰ Yito mwaasi, bu kuranu wej pma bonggo tutwiyari pmai.

²¹ <<Yaa kana we wu yinggi kin, <Mbaa Wu Gira, Mbaa Wu Gira,> diiru wej lau ku diyou, anda buri nere wu tum dangandi Mbaa mi wu diyou.

²² A nyanggu balu, nuwa tum sanggu wej kin, <Mbaa Wu Gira, Mbaa Wu Gira, yi ce tu ningdu wej pina yi gawuri a miringgi din mai, yi din mai yi yikongo wuturindi, yi ninga yiringi riyandi buri tum.>

²³ N saru wej pma gembel min, <N tii bu songgumbiru. Bu laanga poo bonggo mu, mba nuwa bu tum tu bwii wa.>

Ba mweme wu pwiya gi yi wu yaa pwiya gi.

²⁴ <<Dingin tono kana we wu nuu ciyei mi pero ningi wurai yi tono cika nere wu pwiya gi wu monni laa you dwii sweli.

25 Pu gundu toso yarugu, youri twanganga, wutur baa a buu laa wii anda yaa ku yarau, d_in_gi_n nu_wa man taayau dwii sweli.

26 Anda kana we_wu nu_wu ciye_i mi anda yaa ku n_inga wurai yi ton_o cika nere_wu yi cini wu monni_i laa you_a swai.

27 Pu gundu toso yarugu, youri twanganga, pero wuture n_inga, a buu laa wii, a yara, yarangu_wu you_a a n_inga wang.>>

28 Pu Yesu mata cegu to yiringi_i, nu_wa bwii riyanga bur_i yi yiringi_i tu jukugu,

29 d_in_gi_n a jukugu yiringi_i cika nere_wu yi dimbire, yaa cika kulumba teeringi_i pma wa.

8

Nere wu yi butangi

1 Goro pu Yesu julo cingu kwii, nu_wa tum pongwe_wyo.

2 Nere_wu kangge_wu yi butangi baa bonggo_wyou_a kun kwiyou a ce_kin, <<Mbaa Wu Gira, ka ma lee_i, ma mirangge_n yila a bonggo_wbutangi mi.>>

3 Yesu a yaku wai a cerman yo, a see_kin, <<N lee, yila!>> Yoko_wyoko_wbutangi twii a du nere_wwii.>>

4 Yesu sa yo_kin, <<Ma sari_ya kana we_wtoo_wyiri. Anda ma amna ma juku_wbur_imai kuru Yamba ba su_wamina, pero ma nyii_nii du Musa ce_kin nu_wa ba nyi_ya, d_in_gi_n ninggu walwal. Ma n_inga yito_wd_in_gi_n nu_wa ba soma_wkin ma yila.>>

Leegu jire bagira kacaraa wu Roma

⁵ Pu Yesu diiro Kaparnahum, kacala Roma wa wu kangge baa kinga yo a senggo yo kin,

⁶ <<Nere wu gira, kewe mi woo pidau lai, buri yei borgi a cusugu wang.>>

⁷ Yesu see kin, <<N anggu wei n mira yo.>>

⁸ Bagira kacaraa wii ce kin, <<Ang ang yaa yito Mbaa Wu Gira, mi yinnibu ma baa laa mu, anda mo ce ciyei tibak, kewe mi yi wei.

⁹ Dingin mi mwa n woo kuu nere wu kangge, pero dong n woo yi kacara kuu mu, ka n sar wuna min, <Amna,> yo ba aara, wu kangge dong n see min, <Bame!> bur ba baa, pero ka n sar kewe mi min, <Ninga yiri nyo!> Bur ba ninga.>>

¹⁰ Pu Yesu nuwa yito, a riyanga buri, a sa nuwa bu ponggu yo wa kin, <<N woo sagumbiru jirei yaa ku n nyingga nere wu leegu jire ku yi dimbire cika kinaa a Israila.

¹¹ N woo sagumbiru nuwa tum baanga wei bonggo donome yi nyambirangu ba sindi siyau, a jegu a naagu kem yi Ibrahim yi Icku yi Yakubu a lau ku diyou.

¹² Anda pma bu daaya ba teendo lau ku diyou nuwa parnu wei pma kumjila, pu pma jii wei wiindi yi dumonggu nyiyau.>>

¹³ Anda Yesu sa bagira kacaraa wii kin, <<Mwati lai, cika ku ma pu jire nindu wei yito.>> Anda kewe bagira kacaraa wii a yila kinangu.

Yesu mira nuwa tum

¹⁴ Yesu aara laa Bitrus, a kingga sii Bitrus wu nure a pidau yi buri wulok.

¹⁵ A mwaanga wai yau, bur buri wulok swii man yo, a wuni, a ningaman yo jeendi.

16 Ku lam nyambiranggu nuwa demuwe Yesu nuwa bu yi wuturindi wa tum. Yesu yikongo wuturindi yi ciyej tibak, a mira pma bu yaa cingcing wa pma yilanga mwa mwa.

17 Too ningwa yito palaka ba twanga tu banabi Icaya ce kin, <<A de dwal buri cingcing yiru yi buwangi yiri.>>

Ponggu Yesu yi buu

18 Pu Yesu kuranga kin nuwa tum wora yo, a sa kwatimba ya kin ba yerongo gingu kalinggi kwii.

19 Kulum teeringi a baa bonggo yau a ce kin, <<Kulume, mi pongminu wei kana piyau pu mo annu wau.>>

20 Yesu nyii lee kin, <<Bapirmisindi boo yi boring pmai, yidi mwa yi cwaaringi pmai, anda Bol Nere yaa pu daa miru.>>

21 Wu kangge cudi kwatimba ya a ce kin, <<Mbaa Wu Gira, dungge bati n angge n tingwe mbaa mi.>>

22 Yesu see kin, <<Pongguwe du nuwa bu bwanggi wa ba tingi kappima bu bwaanggi wa.>>

Yesu yera wuture yi gwerai gundi

23 Yesu diiro konggoru anda kwatimba ya pong yo.

24 Yaa temandi bur wutur gundu a wunuwe. Gwerai gundi a paringgu gundu a miringgu konggoru, anda Yesu a diima.

25 Kwatimba ya aanda bonggo you a romya pma ce kin, <<Mbaa Wu Gira, mira yiro, yi bwanu wei.>>

26 <<Yesu sa pma kin, <<Dingin ca bu nuugu gwasi, mba bu leegu jire mbiru banyina wa?>> Bur a wuni a yera wuture yi gwere gundu dwii, bur a sin siyei tok.

27 Kana we riyanga buri kin, <<Kinaa kono duu neru? Wu kana wuture yi gwerai gundi ningi pongondi yi yo!>>

Yesu yil nuwa rop bu yi wutur wa

28 Pu Yesu aara bonggo sima Gadara* a ging kalinggi kwii, a kaanga yi nuwa rop bu twiyongo dwiiyongi puringi, nuwa bwii yi wuturindi. Pma yi kweji wang dingin tonoyaa nere wu pong wii nyinou.

29 Pma ninga duwai kinangu kin, <<Boi Yamba ma kasigu ca yi yo? Ma baa pina ma turo yiro bo jor lam bu ru?>>

30 Kan bakambi su lai soo nem yi poo wii, a taagu taawu.

31 Wuturindi swii senggo Yesu kin, <<Ka ma yiki yire ma suka yiro yi teendo miringgi bakambi su lai swii.

32 Yesu sa pma kin, <<Bu ambira>> Pma twiyongo, teendo bakambi su lai swii. Mwa mwa kan bakambi swii a mwatanga kilang kilang a julomana cerau a yaramana gundu a bwaamana a miringgi.

33 Nuwa bu taagu bakambi su laa swii pma ceendo gweji, pma nyii nuwa labar yiringi tu ningwai yi nuwa bu yi wuturindi bwii.

* **8:28 8:28** Lakargarindi su kanggi a bala kin sima Gargasinaawa bu kangga bala kin sima Garasinawa

³⁴ Kana we_a miringgi_gwei_dwii, a mwati dingin ba kanga yi Yesu, anda pu ko_yo_a senggo yo_ba du sima pma.

9

Yesu mira nere_wu buri_borigi

¹ Yesu geero konggoru a waata buri, a yeri bonggo kalinggi a aara gwei_yei.

² Nuwa demuwe_yo_nere_wu buri_borigi a pidau_yuu. Pu Yesu ko_leegu_jire_pmau, a sa nere_wu buri_borigi wii_kin, <<Ciko_gaanggu bol mi, nuwa paramin sukom welemdi mai.>>

³ Kulumba teeringi_wa bu kangga yanna cegu ciyei_yi_buri_pmai_kin, <<Nere_woo_bwiyanggu din Yambai!>>

⁴ Yesu kuranga tu pma danganggi_a ce_kin, <<Dingin ca bu danganggu_yiringi tu bwii a gaanggiri mbiri_yito?>>

⁵ Tu leele_e_tono, yiku n sa nere_wo_min, <N paramin sukom welem mau,> yi_ku n see_min, <Wuni ma ninga songma?>

⁶ Anda n kasi_bu_soma_min, Bol Nere_woo_yi dimbire_a_sima_ba para sukom welem.>> Anda a sa nere_wu buri_borigi wii_kin, <<Wuni, ma de_yuu mau, ma mwati lai.>>

⁷ Nere_wii_wuni, a mwati_laa_you.

⁸ Pu nuwa bu kuranggi_buri_ko_yo, pma nuu gwasi, pma teranga Yamba dingin_woo_dimbire_wu_nyii_nuwa.

Yesu yi Matayo

9 Yesu du poo wii, anda pu songmau, a ko nere wu yiri janggal wu din yei Matayo, a pisu pu nuwa yiri janggal. A see kin, <<Pongguwe.>>

Matayo wuni, a pong yo.

10 Pu Yesu woo jegu jeendi laa Matayo, nuwa bu yiri janggal wa tum yi nuwa bu kangga bu yi welem wa pma baanga je jeendi kem yi yo yi kwatimba ya.

11 Parisayo bu kangga ku ko yito pma pira kwatimba ya kin, <<Dingin ca kulum mbire a jegu jeendi yi nuwa yir janggal yi bu yi welem wa?>>

12 Pu Yesu nuwa, a sa pma kin, <<Nuwa bu cingcing wa yaa kasi kulume, bur nuwa bu yaa cingcing wa.>>

13 Ambira bu yesa tu lakargar Yamba cej, <Tu n kasi twii nuwa ba juki bunam, twii nyiigu nii ne.> N baa bu dingin nuwa bu ningi pisu wu nyaau a gawuri Yambai anda n baa dingin nuwa bu yi welem wa.>>

Pira dwii degu cooji

14 Kwatimba Yohanna wu Ningi Batisima baanga bonggo Yesu a pira kin, <<Dingin ca yo yi Parisayo yi ning cooji nyikirik anda kwatimba ma yaa ningi?>>

15 Yesu nyii lee kin, <<Ningduwe nye basinba laabwiya wa ba de cooji pu bo woo kem yi bwiyaka wu laabwiya weyo ru?>> Anda daandi soo baayi su nuwa demanu wei bwiyaka wu laabwiya weyo a bonggo pmau, bur pma ningi wei cooji.

16 <<Yaa wu cwakinu wei see wu puce a dwii wu milga, ka nindi yito wu nuwa cwakina wii kwaciranu wei see wii ba diina ba pwarwa wang.

17 Pero yaa nere wu deru wei gundu inabi ku pucu ba parna cweindi biyari tu milgai, ka nindi yito gundu inabi ku puci kwii, repanu wei cweindi biyari twii, pero gundu inabi kwii ba par siyau. Anda nuwa ba parna a cweindi biyari tu puci, mwa mwa pmau ba ningga kundi.

Bweecanga nere wu gira yi nur wu mwaanga gatangamau Yesu

18 Pu Yesu woo cegu tina yiringi, nere wu gira wu gireng kuru a baa bonggo you a kun kwiyowu gawuri yei, a ce kin, <<Bweecanga mi a bwaa yoko kina, bame ma cenni wai wuni wei yi piima.>>

19 Yesu wuni a pong yo, kem yi kwatimba ya.

20 Nur wu kangge wu tiigu kuulu yi buwai pargu siyei tiimau nyan mildi kwap sur rop, a baa gorou Yesu a pilo nyan gatangamau you.

21 A sa buri yei kin, <<Ka n pili kana gatangamau you, n yilu wei.>>

22 Yesu waka kau a ko yo, a ce kin, <<Bweecanga mi ciko gaangu, leegu jire mau a miramina.>> A dwii jore nure wii ninga cingcing.

23 Pu Yesu lama laa nere wu gira wu gireng kuru, ku ko nuwa kwarindi yi bu kangga wuugu bagaati boore,

24 a ce kin, Kana we ba twiyo. <<Bweecanga woo yaa bwaagi, a diima!>> Pma rii yo.

25 Ku nu_{wa} yiku nu_{wa} bwii twalange, Yesu tee_{wai}, a wuni.

26 Labar yo_{wasi} bu_{ri} kana piyau a si_{ma} bwii.

Yesu mira kerma rop

27 Pu Yesu du poo_{wii}, kerma rop pongu_{yo} pma ning_u duwau a cegu_{kin}, <<Bo_l Dawud, nu_u bunam yiru!>>

28 Pu Yesu diiro laa wu pi_{su} mi_{ri}, kerma bu rop bwii baanga bonggo_{you} anda a pi_{ra} pma kin, <<Bu lee_{jirei} n puu wei_{kalanggi} mbir du?>>

Pma le_{eman} yo_{kin}, <<Ong nere_{wu} gira.>>

29 Yesu mwaanga nundu pmai a ce_{kin}, <<Yama ba ning_{wa} cika ku_{bu} lee_{jirei}!>>

30 Nundi pmai toso kogu_{Yesu} sa pma kin, <<Bu sari ya kana we!>>

31 Anda pma mwatanga a wasi_{ciyei} dwii Yesu kana piyau a si_{ma} bwii.

Yesu mira nere wu yaa ce ciyei

32 Pu pma twiyongo, nu_{wa} bu kangga dee_{nere} wu yaa ce_{ciyei} dingin_{yi} wuturindi a bonggo_{Yesu}.

33 Anda ku Yesu yiki wutur wii, nere_{wii} toso cegu_{ciyeu}, kana we_{riyanga} bu_{ri} pma ce_{kin}, <<Yaa ku yi ti_i kogu_{yiri} cika ti_{na} a Israila!>>

34 Anda Parisayo ce_{kin}, <<Twii bagira wuturindi a nyii_{yo} dimbire_{ba} yiki wuturindi.>>

Yesu nuu bunam nuwau

35 Yesu wora gorondi_{tu} girai_{yi} tu nyititi. A jukugu_{yiringi} a girindi_{kuri} pmai, a wasigu_{ciyei} du teng a dwii lau_{Yambau} pero a mira

nuwa tum yi buwangi wundu wundu yi buri wulok pma yilanga.

³⁶ Ku ko nuwa kuranggi buri tum, a nuu bunam pmau dingin pma tiigu kuulu pero tetenggi, yaa nere wu kalanu wei pma, cika puuri su yaa taage.

³⁷ A sa kwatimba ya kin, <<Jama bu biya wa a ninga tum, anda nuwa bu kaci wa ninga banyina.

³⁸ Dingin tono, bu senggo Nere wu kondo wa yau ba tumuwe nuwa wura wa a kondo you.>>

10

Yesu tum kwatimba kwap sur rop

¹ Yesu yiwe kwatimba ya kwap sur rop pweyau piinou, a nyii pma dimbire ba yiki wuturindi pero ba mira kana kono du buwai.

² Tinaa dinendi nuwa tumandi wa Yesu wa bu kwap sur rop wu gawuriyo wii Simon, (wu nuwa yiri kin Bitrus) yi ciya yo Andarawus, Yakubu bol Sabadi yi ciya yo Yohanna,

³ Pilibus yi Bartalamawus yi Toma yi Matayo wu yiri janggal, yi Yakubu bol Alpayo, yi Tadawus,

⁴ yi Simon wu yi bwiu dingin sima ya yi Yahuda Iskariyoti wu cuu Yesu.

⁵ Nuwa bu kwap sur rop bu Yesu tuma bwii a nyii pma dikacene kin, <<Bu ambir ya bonggo nuwa bu yaa yoogi nuwa bu Yudaya wa, yi gorondi nuwa bu Samariya wa.

⁶ Bu ambira bonggo nuwa bu Israila wa bu liyanga cika puuri su yaa taage.

⁷ Ambira bu wasi ciyei min, <Lau ku diyou ninga nem!>

⁸ Bu mira bu yaa cingcing wa, bu wumongo bu bwaanga wa, bu mira babutanga, pero bu yikongo wuturindi. Nuwa nyiimbira nyo bu nyiia nyo.

⁹ Bu deri ya sinariya yi asurpa, yi kana kene a swari mbire,

¹⁰ bu deri ya swari songmai kana landari rop yi paari, yi jwalu dingin nere wurai a yinno nuwa ba nyii jeendi.

¹¹ <<Ka bu tembiro gwei du girai yi du banyinai bu kasa nere wu yi mbir wei bu sindi siyei a pwii kopo nyanggu ku bu duru wei poo wii.

¹² Ka bu tembir laa wii bu ci pma.

¹³ Ka nuwa bu laa wii yoo bu nyaa wa, yama pidau gaanggu mbiru ba siya bonggo pmau, ka kwaai yama pidau gaanggu ba waata buri bonggo mbiru.

¹⁴ Anda kana piyau pu nuwa kwaa yigu mbiru pero kwaa ba ka twiyau yi mba, bu kapa gur du mwar mbiri, ka bu dur gwei dwii.

¹⁵ N woo sagumbiru jire, a nyanggu balu, Yamba nuu wei bunam nuwa bu Sodom yi Gomora yiku ba nuu bunam gwei dwii!

Tigu kuule ku ko baawu

¹⁶ N woo tungu mbiru cika puuri a cudi geppindi. Bu yoo pwiyangi cika coogindi pero tok cika bamori.

17 Bu sindi siyei cipigi buri, nuwa rembiru wei, ba dembira laa balu pero ba wacambira wei a girindi kuru.

18 Nuwa dembiru wei gawuri gomnandi yi balamba dingin mi. Anda too yoo mbiru wei nyinou wu bu wasiri wei ciyei du teng a dwii mi a bonggo balamba yi nuwa bu yaa yoogi nuwa bu Yudaya wa.

19 Ka rembiri bonggo balu bu domi ya buri min tu bu ce wei ca yi kanda ku bu ce wau, ka jori yei lami Yamba nyimbiri wei tu bu ce wei,

20 dingin bwii mba bu cegu ciyei ne anda twii Bawei Mbaa mbiri a cegu ciyei a miringgi mbiru.

21 <<Ciyate nyii wei ciya yo nuwa ba jiyo, yito mwa mbaate yi bol yo. Kwaraa wunmanu wei kwiimba diinu wei nuwa ba laca pma.>>

22 Nuwa mwa mwa kwaambiri wei dingin mi. Anda kana we wu boo gaanggu lam nyanggu ku pungu nyinggu wei mirma.

23 Ka pma turo mbiri dina gwei bu cembro du kanggi. N woo sagumbiru jire yaa ku bu mati wei worugu gorondi Israila Bol nere baa wei.

24 <<Nere wu tilanggu yiru yaa gwali kulum yo, kewe yaa gwali nere wu gira yo.

25 Nuwa bu tilanggu yiringi wa a daaya ba ninga cika kulum pmo yito mwa kewaa a daaya ba ninga cika nere wu gira pmo. Ka nuwa yiri nere wu gira wu laa kin, Baalsabul, gwalanga nuwa bu laa wii wa, nuwa yiru wei pma yi din du gwala doo!

Wu daaya yi gwasa

26 <<Bu nuu ya gwası nuwai, Yaa yiri tu sumgi tu nuwa na wumdi, pero yaa yiri tu tukugi tu nuwa na soni.

27 Yiri tu n sa mbiru kume, bu wasiri wei yi nyanggu. Pero yiri tu bu sewai a tweendi mbiri, bu teeru wei dwii kani.

28 Bu nuu ya gwası nuwa bu jiri buri wa anda yaa ku puu jigu bawei, waka bu nuu gwası Yambai, yo wu puu bwiyanggu mwa mwa buri yi bawei a pari bwalai.

29 Nuwa yaa cuuri banyili nyan kobo rop ru? Anda yaa banyili su yari sima yaa kem yi somgu Mbaa mbiru.

30 Kana kuri mbiri tu dwii a som kuci yei.

31 Dingin tonu, bu nuu ya gwası dingin bu gwala banyili wang.

32 <<Dingin kana we wu ce cudu nuwa kin yo wongge, mi mwa n ningi wei yito a gawur Mbaa mi wu diyou.

33 Anda kana we wu gwelengge a gawuri nuwai, mi mwa n gwelu wei yo a gawuri Mbaa mi wu diyou.

N dee bu pidau gaanggu, anda buri kasigar

34 Bu dangani ya min n baa dingin n dee pidau gaanggu a sima. Ang ang, n baa bu n dee pidau gaanggu, anda n dee kasigar.

35 N baa n din cere

<Cudu nere yi mbaa yo,

bweecanga yi njaa yo,

siite wu nure, ning wei cere yi sii yo wu nure

36 bacen mo wu bwiiye yo wei a miringgi laa mau.>

³⁷ <<Kana we_wu kangman mbaa yo_yi njaa yo_gwalanggi_yaa ku yinno yoogu kwaa mi, ka kangman bol yo_wu nambare_yi_wu nure_gwalanggi_yaa ku yinno ba yoo_kwaa mi.

³⁸ Anda kana we_wu de bu yeu_you, ba pongguwe_yinnibu yoogu kwaa mi.

³⁹ Kana we_wu nyingga piima ya mandu wej_siyau, kana we_wu mansi yej_piima ya dingin mi nyinggu wej.

Yigu woriri

⁴⁰ <<Kana we_wu yimbira a yingge, kana we_wu yingge_a yi_wu tunguwe.

⁴¹ Kana we_wu yi_banabi, dingin twii banabi, yo_yiri wej woriri_banabi. Pero kana we_wu yi_nere_wu nyaa dingin twii nere_wu nyaa yiri_wej woriri_nere_wu nyaa.

⁴² Kana we_wu puu gundu naagu wu wiino wu banyina a miringgi bu yoogi kwatimba muwa, n woo_sagumbiru jire, yiru wej woriri_yej.>>

11

Yohanna tum nuwa bonggo Yesu

¹ Goro pu Yesu mata nyiigu kwatimba ya dikacene, a du poowii a mwati gorondi tu nem a wasigu ciyeu yi jukugu yiringi.

² Pu Yohanna woo jarum a nuu yiringi tu Masiya ninggu, a tum kwatimba ya,

³ ba pira Yesu kin, <<Woo mo_wu bagu wii ru? Yikwii yi yam wu kanggu ru?>>

⁴ Yesu sa pma kin, <<Bu waatanga bu sa Yohanna yiringi tu bu nuu wai yi yiringi tu bu koi,

⁵ kerma boo kogu simau, guwongi boo ninggu songmau, babutanga boo yilanggu, bapimba boo nuugu simau, nuwa bu bwaanggi wa a wunonggu yi piima, pero nuwa boo wasiman ciyei du teng bakuuluwa.

⁶ Yamba diiman wuure pma bu waatan bu yi gorou dingin mi wa.>>

⁷ Pu kwatimba Yohanna wa mwatanga, Yesu toso sugu ciyei nuwa bu kuranggi buri wa a dwii Yohanna, <<Bu ambira sugu ca a gulai? Bu ambira sugu siyang tu cokurok tu wutur mwangu ru?

⁸ Ka yaa yito ne bu twiyongo bu ko ca ki? Nere wu pargi see wu nyaa ru? Yaa yito nuwa bu pari see wu nyaa boo caame balambai.

⁹ Min na, bu twiyongo bu ambira sugu cau? Banabi ru? N woo sagumbiru, yo a gwala banabi.

¹⁰ Wunaa yo Yohanna wu Lakargar Yamba ce ciyei dwii yei kin,
<N tummo wei nere tumandi mi gawuriyo yi mo, wii yo cardu wei nyinou dingin bagu mou.>

¹¹ N woo sagumbiru jire a miringgu nuwa bu nurumba bi pma wa, yaa wu gwala Yohanna wu Ning Batisima yi giru. Anda wu banyina a lau ku diyou Yambau a gwala Yohanna yi giru.

¹² Toso jor du Yohanna wu Ning Batisima wasi ciyei, baa dina jore lau ku diyou a ti kuule, nuwa bu bwii wa kasa ba jee yi dimbire.

¹³ Mwa mwa banabindi yi teeringi Musa a ce ciyei dwii lau ku diyou kopo jor Yohanna,

¹⁴ ka bu kasi bu yi ciyei dwii wei, Yohanna woo Iliya, wu banabindi ce bagu you.

15 Yama nere wii twendi dingin nuugu, ba ka twiyau.

16 Anda Yesu je gawure yi ciyei kin, <<N cipiranu wej nuwa bu sina daandi yi ca? Pma cika bakwara pisindi nyan lummou. A yiyanggu buri pmai a cegu kin,

17 <Yi wuu mbiri bagaati, bu kwa sigu kolou!
Yi pii mbiri pii boori, bu kwaa wiye.>

18 Pu Yohanna baa yaa jee jeendi, yaa naa gundu inabi, anda bu cegu min, yo woo yi wuture.

19 Bol Nere a ba a jegu a naagu, bu cegu min, <Suwa yo woo yi swawu a jegu, a naagu, yo yoogi basin nuwa bu yiri janggal wa, yi nuwa bu yi welem wa.> Anda pwii Yambai jukur kin twii jire a bonggo wurang yei.

Gwej du kwaa leegu jireu

20 Nuwa bu gorondi tu Yesu ninga yiringi riyandi buri tum dwii yaa ku ninga bwiiwau, dingin tono a yerenga gwej dwii.

21 <<Ai mba! Nuwa bu Korasin. Ai mba! Nuwa bu Betsaida! Dingin wurang riyandi buri tu nuwa ninga a miringgi mbiri, ka nuwa na ninga a Taya yi Sidon wej, pma na ninga bwiiwa kilang, na tee gusuringi pero na parni buro dwii pmai!

22 N woo sagumbiru, a nyanggu balu, Yamba nuu wej bunam nuwa bu Taya yi Sidon yiku ba nuu bunam mbiru.

23 Bika nuwa bu Kaparnahum, bu dangani min nuwa dembiri wej diyou ru? Kana banyina,

waka nuwa julumbiri wei Hades!* Ka yiringi riyandi buri tu nuwa ningai a bonggo mo, ka na ningwa Sodom wai, reni pma na boo!

²⁴ N woo sagumbiru a nyanggu balu, Yamba nuu wei bunam gwei Sodom yiku ba nuu bunam mbiru.

Bambe bonggo mu bu yorongga

²⁵ A dwii jore Yesu ce kuru kin, <<Mbaa, mo Mbaa Wu Gira wu yi diyou yi sima, n wanamina, dingin mo tuko tina yiringi a bonggo pma bu pwiyanggi wa yi bu yi somandi, anda mo juku bakwara bu nyititi wa.

²⁶ Yito Mbaa, too yiringi ningwa cika ku mo kasu.

²⁷ Mbaa mi nyiinggi yiringi mwa mwa. Yaa nere wu som Bwiya wii bur Mbaate, pero yaa wu som Mbaate bur Bwiya wii yi bu Bwiya wii kasa ba juku pma Mbaa yo.

²⁸ <<Bambe bonggo mu, mba bu janganga pero deegi see komburom wa, n nyii mbir wei yoronggu.

²⁹ Bu dee sou garama mu pero bu tilanga bonggo mu dingin n bubuk yi dwii du cinggai, pero bu nyingu wei yoronggu bonggo bawei.

³⁰ Dingin sou garama mu yaa komburom, see wu n ceri mbiri wei sakirak.>>

12

Pira dwii nyanggu sabadu

* **11:23 11:23** Hades pwii pu nuwa bu bwaanggi wa sii miru

¹ A dwii jore Yesu songma a koondi alkama nyanggu sabadu, kwatimba ya nuu june pma cora alkama a woo.

² Ku Parisayo ko, pma sa Yesu kin, <<Suwa! Kwatimba ma ninggu yiri tu teeri yiri jee kin nuwa ba ning ya nyanggu sabadu!>>

³ A leeman pma kin, <<Celeke bu tii bu cegu yiri tu Dawud ninga pu yo nuu june yi basinba songma ya wa ru?

⁴ Yo diiro Laa Yambau, yo yi barauwa ya pma jee kumaa wu coogi, kana ku teere jeu pma ba jee ya, bur kuruwa Yamba wa ba jee.

⁵ Pero yaa ku bu tii bu cegu miringgi teere Musa kin kuruwa Yamba wa pma pari teere a laa Yambau nyanggu sabadu anda kana yito pma yaa welem.

⁶ N woo sagumbiru woo yi wu kangge a pina wu gwala Laa Yambau yi giru.

⁷ Lakargar Yamba ce kin, <Tu n kasi twii nuwa ba juki bunam, twii nyigu nii ne,> ka bu som too yiringi yaa ku bu ningamanu wei nuwa bali min yi welem anda yaa welem.

⁸ Dingin Bol Nere twii Mbaa Wu Gira nyanggu sabadu.>>

Yesu mira nere wu wai borgi nyanggu sabadu

⁹ Pu Yesu du poo wii, a aara diiro gireng kuru pma,

¹⁰ woo yi nere wu wai borgi pwii. Pma dwaagu ba nyingga yo yi welem. Pma pira yo kin, <<Teere yiri jee nuwa ba miri ya nere nyanggu Sabadu ru?>>

11 Anda a lee man pma kin, <<Yikwii wii we a cudu mbiri ka puuri yo yanni bou nyanggu sabadu na taa ba yiki we?

12 Anda nere gwala bu puure kwaara ru? Ong teere lee nere ba ninga yiringi tu nyaayi nyanggu sabadu.>>

13 Bur a sa nere wii kin, <<Tari wai mou.>> Nere wii tari wai you, bur wai you waata buri cingcing cika wu kanggu wii!

14 Anda Parisayo a twiyongo twalange palaka ba kasa nyindi su pmai jiru wei Yesu.

Yesu kewe wu Yamba seka

15 Yesu som tu pma kasigu ninggi. Dingin tono a du poo wii, nuwa tum pong yo. A mira pma bu yaa cingcing wa mwa mwa, pma yilanga.

16 A nyii pma dikacene kin, ba ce ya ka yo we wei.

17 Too a twanga yiri tu banabi Icaya ce a dwii yei kin,

18 <<Suwa kewe mi wu n seka.

Wii yo wu n kangman yo,

wu dirangin gaanggu.

N diinu wei Bawei mi a miringgi yei,

anda yo sar wei jire nuwa bu sima wa.

19 Yaa ku ningu wei gwela

kana ba wun miu you a nyindi.

20 Yaa ku penu wei bu yaa cingcing wa,

kana ba nuu buu nuwa bu yaa dimbire wa,

kopo ka diini jirei je gawure.

21 Anda miringgi din yei nuwa bu sima wa

mannu wei nii.

Yesu yi Baalsabul

22 A dwii jore pma demuwe Yesu nere wu kangge wu yi wuturindi twii kermo pero yaa ce ciyei. Yesu mira nere wii palaka ba ko pero ba nuu sima.

23 Nuwa bwii riyanga buru a pira kin, <<Yikwii woo Yesu Bol Dawud ru?>>

24 Anda ku Parisayo nuwa yito pma ce kin, <<Mwele, nere wo, woo Baalsabul tibak, bagira wuturindi, a nyii yo dimbire ba yiki wuturindi.>>

25 Anda Yesu kuranga dangandi pmai, yo sa pma kin, <<Kana kono lau ku cwaanga buru rop bagu cere yi buru pmai, ko lau bwii ru wei, yito mwa yi kana dono gwei kana laa ka cwaani buru bagu cere yi buru pmai wo laa na tin tiyei.

26 Anda ka Balaa Buwai yikir Balaa Buwai, a cwaanga buru yei, a bagu cere yi dwii yei. Lau you ning wei nye ba tin tiyau?

27 Ka n yikigu wuturindi yi dimbire Baalsabul wei, nuwa mba rei? Pma yikiri yi dimbir we? Dingin tono, pma ningi mbiru wei bali.

28 Anda ka n yikiri wuturindi yi dimbiri Bawei Yamba wai, lau Yambau baa dwii mbiri.

29 Bang bang, yaa neru wu puu wei dimma laa nere wu yi dimbire ba dee see yo, kopo ka twali neru wu dimbir wii bati, anda ba puu degu see yo.

30 Nere wu yaa kem yi mi, yo bagu cere yi mi, nere wu kalanggu bu kurangu, yo weenggu siyau.

31 <<Dingin tono n sagumbiru, Yamba paramanu wei sukom welemdi nuwa yi kana ca tu bwii tu pma ce wei, anda kana we wu ce ciyei

du bwii a dwii Bawei du Walwal, Yamba na paraman yo sukom welem you.

³² Kana we wu ce ciyei du bwii a dwii Bol Nere Yamba paramanu wei yo sukom welem you, anda kana we wu ce ciyei du bwii a dwii Bawei du Walwal Yamba na paraman yo sukom welem you, kana sina daandi kana daandi su baai.

³³ <<Nuwa kuran sou bonggo tutwiyari yei. Ka sou kundi tutwiyari yei ningu wei kundi. Ka sou yaa kundi ne, tutwiyari yei na ningi kundi.

³⁴ Mba coogindi su bwii! Nindu wei nye nuwa bu bwiiwa cika mba ba ce tu kundi? Yiring tu nere ciyei twiiwei miringgu gaanggu you.

³⁵ Nere wu nyaa ning wurang tu nyaayi, dingin wurang tu nyaayi twiiwei miringgu gaanggu you. Nere wu bwiiye ning wurang tu bwii, dingin wurang tu bwii twiiwei miringgu gaanggu you ku bwii.

³⁶ Anda n woo sagumbiru, a nyanggu balu nuwa nyii wei lee a dwii kana dono ciyei du nyoi du pma cei.

³⁷ Dingin gon ciyei du bu cei pera mbir wei bonggo bali pero twala mbir wei bonggo balu.>>

Somdi Yunana

³⁸ Nyanggu ku kanggu kulumba teeringi wa yi Parisayo pma baanga bonggo Yesu a ce kin, <<Kulume, yi kasi ma juku yir somdi yiri riyandi buri.>>

³⁹ Yesu nyii pma lee kin, <<Mba nuwa bu bwii wa bu sinaa daandi wa, bu yaa gwasi Yamba wa, bu kasi yiri somdi riyandi buri, yaa ku n

ningambiri somdi riyandi buri ka gwal tu banabi Yunana.

⁴⁰ Dingin cika ku Yunana woo pwii jingne wu dudu yo nyan daa kunong yi kum kunong, yito Bol Nere ningu wei daa kunong miringgu sima nyanggu yi kume.

⁴¹ Nuwa bu Ninebe wa baa tindi tiyandi kem yi mba nuwa bu sina daandi wa a nyanggu ku Yamba ningamanu wei bali nuwa, pma sambiri wei kin bee welem, dingin pma ninga bwiiwa a jor du Yunana wasiman pma ciyei Yambai, nere wu gwala Yunana woo pina.

⁴² Balaa wu nure wu sima bu taadi wa, ba tiro tiyei kem yi mba nuwa bu sina daandi a nyanggu ku Yamba ningamanu wei bali nuwa, yo sambiri wei kin bee welem, dingin yo duwe sima ya kwaara dingin ba baa nuu pwii Balaa Solomon, anda nere wu gwala Solomon woo pina.

⁴³ <<Ka wutur twii buri neri, mwatir pu yaa gundu a kasanggu pu yoronu. Ka yo kingga bu ne,

⁴⁴ yo ba ce kin, <N waatu wei buri a laa mu wu n twiwe miru.> Ka baa kinggi laa wii candigi, pero menengi yaa tu kanggi,

⁴⁵ bur yo ba waata ba de kapina wuturindi a nibiyo su gwala yo yi tuwe baa ba sindi siyau a pwii. Cwata goro you, pisu nere wii gwalu wei pisu you wu gawuriyo yi bwiige. Tinaa kanda ku nindi wei yi pma nuwa bu bwiiwa bu sina daandi wa.>>

Njaa Yesu yi ciyamba ya

46 Pu Yesu woo cegu ciyei yi nuwa tum njaa yo yi ciyamba ya boo pitindi twalange, kasi ba sa ciyei.

47 Wu kangge cudu pmai sa Yesu kin <<Njaa mo yi ciyamba ma boo pitindi twalange kasigu ba ce ciyei yi mo.>>

48 Yesu pira kin, <<Njaa mi wii we? Ciyamba muwa bwii bu we?

49 Bur a juka kwatimba ya a ce kin, <<Bu suwa tina njaa mi yi ciyamba muwa.

50 Kana we wu tum dangandi Mbaa mi wu diyou twii ciya mi wu nure yi wu nambare yi njaa mi!>>

13

Balanggu ceu a dwii bajome wu waci duu

1 A nyanggu kwii Yesu duu laa wii a mwati a sin siyau ging kalinggu.

2 Nuwa tum kuranga buri bonggo you, dingin tono a geero konggoru, a sin siyau pwii. Nuwa pma ka pitindi gingu.

3 A sa pma yiringi tum yi balanggu ciyeu kin, <<Bu ka twiyau! Nere wu kangge a de duu aara wacigu kondo you.

4 Pu woo wacigu duu kwii, goma bu kangga yaramana dwii nyinou, yidi baa kwama.

5 Bu kangga yaramana pu yi swaringi, pu yi swai banyina. A boro kilang kilang dingin swai dwii yaa tum.

6 Anda pu nyanggu biya a kusuwa dingin yaa swandi.

7 Goma bu kangga yaramana pu yi turi, turi twii gira, a kicanga pma.

8 Goma bu kangga dong yaramana sima bu nyaa wa, a biyo a gwala tu nuwa waci daa kuno kunong yi kun nokono, yi woon woon.

9 Yama nere wii twendi dingin nuugu, ba ka twiyau.>>

10 Kwatimba ya baanga pira yo kin, <<Dingin ca ma cee ciyei yi balangu ciyeu ka ma pirgu yiri nuwa?>>

11 Yesu nyii lee kin, <<Mba, Yamba leembira, bu som tu tukugi tu lau ku diyou, anda bu kangga yaa yito.

12 Kana we wu woo yi tonon nuwa cwatamanu wei yo ba ninga tum. Kana we wu yaa yiri dong, kana tu woo yi tonoi nuwa yiyamanu wei yo.

13 Too tu diinai n nindi wurai yi ciyei du balanggai,

Dingin pma suwi, anda pma yaa kweeyi.

Pma nuwi, anda yaa kar twiyau kana ba kuranga.

14 A twanga tu banabi Icaya ce a dwii pma kin,

Bu ning wei pu nuugu anda bu kurani,

Bu ning wei pu suugu anda bu kwei.

15 Dingen nuwa boo gaangiri pmai cingcing

pero twendi pmai yaa nuu sima,

pma lakanga nundu pmai.

Ka yito ne pma kwee wei sima yi nundi pmai,

pero nuu wei sima yi twendi pmai,

ba kuranga yi gaangiri pmai,

ba waatanga bonggo mu

palaka n mira pma.>

16 <<Anda wuure bonggo nundi mbiri dingin bu kweeyi pero twendi mbiri nuuwi.

17 N woo sagumbiru jirei, banabindi tum yi nuwa bu nyaa wa tum kasa kogu yiringi tu bu kogu tina anda pma ko bu, a kasa pmai nuu yiringi tu bu nuugu, anda pma nuu bu.

18 <<Yoko bu ka twiyau pitindi ciyei du balanggai dwii bajoome a pigu yiru.

19 Goma bu yaramana a nyinou wa twii nuwa bu nuu ciyei lau diyou anda yaa ku kurangau . Bur Balaa Buwai ba a yiyaman siyei a miringgi gaanggu pma.

20 Goma bu dwii swaringi wa twii nuwa bu nuu ciyei dwii, a yiya yoko yoko yi buri degdeg.

21 Anda yake ku yaa swandi ko, yaa ku siya wang. Pu kuulu yi cusugu bammanuwe pma dingin ciyei dwii, yoko yoko pma ba yaranga.

22 Goma bu yaramana miringgi turi wa twii nuwa bu nuu ciyei Yambai, anda dangandi see wu sima yi gina a welenga, a gwala dimbiri ciyei dwii a ja ninggu gomau.

23 Goma bu yaramana swai du nyaayi twii nuwa bu nuu ciyei Yambai a kuranga. Wii wu bi goma kuno kunong yi kun nokono, yi woondi a gwala ku nuwa piyau!>>

Ciyei du balanggai a dwii alkama yi kule

24 Yesu nyii balanggu ciyeu ku kanggu kin, <<Lau ku diyou cika bajome wu pii duu ku nyaau a kondou you.

25 Anda ku nuwa boo diima yi kume, bacen yo ba pii kule a miringgi alkama wii a liya mwati.

26 Pu girau a teen goma, kule dwii mwaasi a twiyo.

27 Kewaa nere wu kondou we you anda sa yo kin, <Nere wu gira, tu ma piya twii duu ku nyaau ne ru? Anda na kule wuna twiiwe piyau?>

28 <<Bajome wii ce kin, <Twii bacente ninga yito!> Pma ce kin, <Yi aanda yi podo ru?>

29 A sa pma kin, <Ka bu ningi yito, bu podo wej alkama.

30 Bu du pma ba giranga kem kopo nyanggu kacigi. N saru wej nuwa wurai wa a jor kacigi dwii pma ba seka kule wii, ba bweenga gwelendi gwelendi ba taa, ba teeni alkama mi a bindou.>>>

Ciyei du balangai a dwii gon mustad

31 Pero Yesu sa pma balanggu ceu du kanggu kin, <<Lau ku diyou cika gon mustad du nere wu kangge de aara piya a kondou you.

32 Kana ku too gon duu du banyinai a miringgi duu mwa mwa, anda ka giri gwali kana kono duu wandi ali, pero ba yoo sou. Yidi baangai ba cwaani cwaaringi pmai a betindi yei.>>

Ciyei du balangai a dwii yisti

33 Yesu pero sagu pma balanggu ceu du kanggu kin, <<Lau ku diyou cika yisti wu nure wu kangge dee tuura yi lemene kunong ku miima alkama wa, miima bwii mwa mwa yoo yisti.>>

34 Yesu ning wurai yi balanggi ciyei, pu sagu mwa mwa too yiringi nuwa bu tum bwii. Manggu yaa sar pma ciyei kopo yi balanggu ciyeu.

35 A twanga tu banabi ciyei kin:
 <<N sa mbiru wei ciyei yi ciyei du balanggai,
 N yesa mbiru wei yiringi tu tukugai yake
 toson taa ruugu simau.

Pitindi ciyei du balanggai a dwii alkama yi kule

36 Bur Yesu du nuwa twalange, a diiro laa wii.
 Kwatimba ya baanga bonggo yo pma ce kin,
 <<Kam kam sa yir pitindi balanggi ciyei a dwii
 kule du kondou dwii.>>

37 Yesu nyii lee kin, <<Bol Nere twii bajome,
 wu pii duu ku nyaa kwii.

38 Kondou twii sima, mwa mwa, pero duu ku
 nyaa kuwii twii nuwa bu lau ku diyou wa. Kule
 wii, twii kwaraa Balaa Buwai.

39 Bacente wu pii kule miringgi alkama wii
 Balaa Buwai. Nyangu kacigu twii nyangu ku
 cwata gorou, nuwa bu kacugu wa twii
 bacamandi.

40 <<Cika ku nuwa yikiri kule ba taa, nindu
 wei yito nyangu ku cwata gorou.

41 Bol Nere tumo wei bacamandi, pma
 demanu wei kana we wu diini nuwa ba ninga
 welem wa, yi wu ning tu bwii a lau you.

42 Pero bacamandi swii parnu wei pma par
 bwalai, pu pma jii wei wiindi yi dumonggu
 nyiyau.

43 Anda nuwa bu ningi pisu wu nyaa ku
 gawuri Yambai nyilanu wei cika nyangu a lau
 Mbaa pmau. Yama nere wii twendi dingin
 nuugu, ba ka twiyau.

Balanggu ciyei a dwii gina wu tukugi

44 <<Lau ku diyou cika gina wu tukugi a kondou. Pu nere wu kanggi kinggau a pero tukugu, a ninga buri degdeg a aara cuu kana ca tu woo yi tonoi a ten kodou wii.

Ciyei du balangai dwii gisou

45 <<Lau ku diyou cika, nere wu kasanggu gisi tu nyaai,

46 anda ku nyingga gisou kiino ku yi pircu wang, a aara cuu kana ca tu woo yi tonoi a tena.

Balanggu ciyei a dwii lemu

47 <<Mwaasi, lau ku diyou cika, lemdi su nuwa parna you ree kana konu du jindu.

48 Pu lem wii twangwa, pma yikuwe a gingu a sin siyandi a seka jindi su nyaayi a parna tacingi pmai, su yaa kundi a par siyei.

49 Nindu wei yito nyangu ku cwata gorou. Bacamandi cwanu wei nuwa bu ningi pisu wu nyaau gawuri Yamba wa yi nuwa bu bwii wa.

50 Parnu wei pma par bwalai pu pma jii wei wiindi yi dumonggu nyiyau.

Jire wu puce yi wu milga

51 Yesu pira kin, <<Bu kuranga too yiringi ru?>>

Pma lee kin, <<Ong.>>

52 Anda a sa pma kin, <<Too yiri pitindi twii, kana wono kulum teere wu yoo bwiyaka wu lau ku diyou, yo cika nere wu laa wayau, wu yikiwe gina wu puci yi wu milgai miringgi kandi du ruuni see yei.>>

Nuwa kwaa Yesu a gwei yei

53 Pu Yesu mata sagu pma ciyei du balangai, a du poo wii.

54 A waata buri gwei yei. A toso jukugu yiringi nuwa a gireng kuru, nuwa bu nuugu yo wa pma riyanga buri. Pma ninga pira kin, <<Nere woo nyingga too somandi yi yiringi riyandi buri too piyau?

55 Too bol kapinta woo ne ru? Njaa yo wii Maryam yi ciyamba ya Yakubu yi Yusupu yi Simon yi Yahuda ne ru?

56 Ciyamba ya bu nurumba wa yaa pisindi pina mwa mwa kem yi yo ru? Nere woo nyingga too yiringi piyau?>>

57 Pma bwiyinga gaangu a kwaa yo.

Yesu sa pma kin, <<Banabi kinggi nyigu giru kana piyau, anda yaa kinggi gwei yei, yi laa you.>>

58 Yaa ku ninga yiringi riyandi buri tum a pwii, dingin pma lee bu jire.

14

Boori Yohanna wu Ningi Batisima

1 A dwii jore Hiridus balaa wu Galili, a nuu labar Yesu.

2 A sa wula ya kin, <<Wii Yohanna wu Ningi Batisima, a wuni boore, twii tono a ninggu too yiringi riyandi buri.>>

3 Dingin conggo you a din nuwa twala Yohanna, cala yi cali a manna jarum. A ninga yito dingin Hirudiya twii nure ciya yo Pilibus, wu yo yiki yo.

⁴ Dìngìn Yohanna nìngá pu sagu Hiridus kìn, <<Yaa cimacìma yì teerì Yambai ma yiki nure ciya mo!>>

⁵ Hiridus kasa ba jì yo, anda a nuu gwasi nuwa bu Yudaya wa, dìnìngìn pma dee Yohanna twii banabi.

⁶ Nyanggu danggugu yì bir Hiridus bol Hirudiya wu nure sii kolo gawurì runnguwa ya mwa mwa. A bwalaman dwii Hiridus

⁷ a nìngaman yo alkawal kìn, <<N werènga n nyiiminu wej kana ca tu ma senggoi!>>

⁸ Njaa yo saa, ba sa Hiridus kìn, <<Nyìnggi dwii Yohanna wu Nìngì Batisìma yoko yoko a pilai!>>

⁹ Balaa gaanggu you bwiiwa, anda yake ku nìngá alkawal yì wera a gawur runnguwa ya a diin nuwa nyii tu kasai.

¹⁰ Dìnìngìn tonò a sa nuwa ba mwarwe dwii Yohanna wu Nìngì Batisìma a jarum.

¹¹ Nuwa dee dwii yej a pilai nuwa nyii bweecanga wii, a deman njaa yo.

¹² Kwatimba Yohanna wu Nìngì Batisìma wa baanga ba de burì yej aanda tingo, pma mwatanga sa Yesu.

Yesu puu jeendi nuwa tedu nuwo

¹³ Pu Yesu nuu labar Yohanna, a geero konggoru, a aara pu yaa nuwau yo wundu. Ku nuwa nuu tu nìngì wa pma twiyo gorondi pma a pee yì mwari pong yo.

¹⁴ Yesu julo konggoru a ko nuwa tum a nuu bunam pmau a mira pma bu yaa cingcing wa pma yilanga.

15 Pu nyambiranggu ninga kwatimba ya baanga bonggo you a see kin, <<Poo wuna tina gulai, yoko nyambiranggu ninga. Sa nuwa boo ba aanda gorondi tu nem, palaka ba tenmanuwe buri pmai jeendi.>>

16 Yesu nyii pma lee kin, <Kopo ba mwatanga ne, anda mba bu nyii pma yiri ba je!>>

17 Pma see kin, <<Tu yi boo yi tonoi mwa mwa tina kumaa nuwo yi jindi rop tibak.>>

18 Yesu sa pma kin, <<Bu denguwe pina.>>

19 A sa nuwa bwii ba sindi siyei, a dwii siyangi. A dee kumaa wu nuwo wii yi jindi su rop swii, a wun dwii diyou, a ninga wandima a gelenga kumaa wii. A nyii kwatimba ya ba cwaanga, pma cwaanga nuwa bwii.

20 Anda mwa mwa pmau je riyanga. Kwatimba ya gamanga buburingi tu nyonai, a twanga tacingi kwap sur rop.

21 Kuci nuwa bu je jeendu wa bwii twii nambirmba tedu nuwo yaa muringgi nurumba yi bakwara.

Yesu aari songma a dwii gundu

22 Yoko yoko Yesu sa kwatimba ya ba teendo konggoru ba cwiwongo yerou you, pma du yo anda a sa nuwa bwii ba mwatanga.

23 Pu nuwa bwii mwatanga, Yesu geero cingu yo wundu dingin ba ce kuru. Kum ninga woo pwii yo wundu.

24 Anda a doo jore konggoru wii ninga kwaara yi gingu you, gwere gundu turonggu pma dingin wuture wii jagu pma songma.

25 Pu kacu n_{in}ga, Yesu aara bonggo p_{mau} y_i nau a dwii gundi.

26 Pu kwatim_{ba} ya ko_{yo} songma dwii gundui p_{ma} nuu gwasi, p_{ma} n_{in}ga duwai k_{in} <<Twii pit_{in}gga!>> P_{ma} nuu gwasi wang.

27 Yoko_{yo}ko, Yesu sa p_{ma} ciye_i k_{in}, <<Bu bo gaanggu, bu nuuya gwasi, wuna mi!>>

28 Anda Bitrus see_i k_{in}, <<Mbaa Wu Gira ka woo mo we_i sangge_n baa bonggo mou_n n_{in}ga songma gundu.>>

29 Yesu leeman yo_i k_{in}. <<Bame.>>

Bur Bitrus twiyo miringgi konggoru a yanna songma a dwii gundu aara bonggo Yesu.

30 Anda pu ko wutur gundu wii y_i dimbire_a a nuu gwasi a toso jintigu a gundu. A ba kwaram_e k_{in}, <<Mbaa Wu Gira, mirangge.>>

31 Yesu yaki wai you_a a taa yo ce_i k_{in}, <<Ma yaa leegu jireu. Dingin ca ma cwaanga gaanggir rop?>>

32 Pu p_{ma} teendo miringgu konggoru wii, bur wutur wii gwata.

33 Nuwa bu miringgi konggoru bwii kuraman sima Yesu a cegu k_{in}, <<Mangu ma Bol Yamba.>>

Yesu mira nuwa bu yaa cingcing a Jenesarata

34 Pu p_{ma} yerongo kalinggu kwii, p_{ma} julongo a Jenesarata.

35 Pu nuwa bu gwe_i dwii kuranga Yesu, p_{ma} tumamin sima bwii mwa mwa. P_{ma} n_{in}ga pu degu nuwa bu buri_i yaa cingcing wa bonggo Yesu.

³⁶ Pma senggo yo ba du nuwa bu yaa cingcing wa ba mwaanga nyan landa you, anda kana we wu mwaanga nyan landa you a yila.

15

Pirgu ningandi kakai

¹ Parisayo bu kangga kem yi kulumba teeringi wa bu baanga Wurcalima wa, pma baanga bonggo Yesu a pira kin,

² <<Dingin ca kwatimba ma yaa pong tu kakaa pir yei? Pma yaa cardi wari ka wunni jegu jeendi!>>

³ Yesu nyii lee kin, <<Dingin ca mba bu par teeri Yambai dingin pu pong ningandi mbiri?>

⁴ Dingin Yamba ce kin, <Ma nyii giru mbaa mo yi njaa mo,> anda <Kana we wu semtanga mbaa yo yi njaa yo, nuwa ba jiyo.>

⁵ Anda mba bu jukuri min nere ba kwaa kalangu mbaa yo yi njaa yo jor du boo yi biiki, ba ce kin, kana ca tu n woo yi tonoi n nyii Yamba.

⁶ Dingin tonoi bu jukiya min nere ba nyii ya giru mbaa yo, bu kwaa teeri Yambai palaka bu pong ningandi mbiri.

⁷ Mbaa bu yi batal wa! Icaya ce cimacima pu ciyei du baa bonggo Yambai a dwii mbiri, a ce kin,

⁸ <Nuwa boo nyiinggi giru yi nyandi pmai tibak anda gaangiri pmai kwaara yi mi.>

⁹ Pma kurangin sima nyo,

yiringi tu pma jukugu, twii teeringi nuwa
tibak!>>>

Yiri tu bwiyani nere ba ninga yaa walwal

10 Yesu yiwe nuwa bu kuranggi buru wa bwii
ba baanga bonggo you, a sa pma kin, <<Bu ka
twiyau bu kuranga!

11 Yiringi tu diiri nyan neru twii tu diini nere
ba ninga yaa walwal ne anda yiringi tu twiiwei
nyiyau neru bwiyani nere ba ninga yaa
walwal.>>

12 Kwatimba ya baanga bonggo yo ce kin,
<<Ma soma min tu ma ce too a bwiyanan
gaanggu Parisayo ru?>>

13 Yesu nyii lee kin, <<Kana ca tu Mbaa mi wu
diyou pi bu, nuwa podu wei.

14 Bu du pma, too nuwa bu taman jwalu
kermo wa, anda kermo yaa taman jwalu kermo,
dingin mwa pmau yaraman wei boowu.>>

15 Bitrus ce kin, <<Sa yiri pitindi balanggu
ciyei du ma ce doo.>>

16 Yesu sa pma kin, <<Karai kwii bu kuran bu
ru?

17 Bu som bu min kana ca tu diiro nyiyau aari
pwii pero ba twii buru du?

18 Anda yiringi tu twiiwei nyiyau twiiwei
miringgu gaanggu, too tu diini nere ba ninga
yaa walwal.

19 Dingin a miringgi gaanggu dangandi tu bwii
twiiwei, jigu neru, taari, taari yi nurumba buru
wa, kuwi, seedaki leendi, yi bwiyanggu dinu.

20 Too yiringi diin nere ning yaa walwal. Anda jegu jeendi wari yaa cargi, yaa diini nere ba ninga yaa walwal.>>

Leegu jire nuru wu Kanana

21 Yesu du poo wii a mwati sima Taya yi Sidon.

22 Nur Kananiya wa wu bonggondi swii baa bonggo you a wun miu yi duwai kin, <<Mbaa Wu Gira, Bol Dawud, nuu bunam mu, bweecanga mi woo yi wuturindi a cusugu.>>

23 Anda Yesu yaa ku sa yo ciyei. Kwatimba ya baanga bonggo you senggo a ce kin, <<Kee ba mwati! A ponggu yiru ninggu duwau!>>

24 Yesu nyii lee kin, <<Nuwa tumguwe bonggo nuwa bu Israila yi wundu bu cika puuri su liyangai wa.>>

25 Nure wii baa kun kwiyei gawuri yei ce kin, <<Mbaa Wu Gira kalangge.>>

26 Yesu lee kin <<Yaa kundi nuwa ba de jeendi bakwarai ba nyii baindi.>>

27 A nyii lee kin, <<Mbaa Wu Gira, too jire, kana baindi jee tu ywiyongo bonggo nere yo.>>

28 Yesu nyii lee kin, <<Ma yoogi nure wu yi leegu jirau! Nuwa ningaminu wei tu ma kasugu.>> Kinangu kwii bweecanga yo yila.

Yesu mira nuwa tum

29 Yesu du poo wii a mwati kalinggu ku Galili. A gero cingu sin siyei.

30 Nuwa tum baa bonggo you dee guwongi yi kermo yi nere wu mwar borgi, yi bapime yi nuwa bu buri pmai yaa cingcing a bonggo Yesu, a mira pma, pma yilanga.

³¹ Nuwa bwii riyanga burī pu pma ko bapime cegu ciyeu, guwongi a yila, nere wu mwar borgi a songma, kermo kogu sima. Buri pma terenga Yamba wu Israila.

Yesu puu jeendi nuwa tedu ni

³² Yesu yiwe kwatimba ya a sa pma kin, <<N nuugu bunam nuwa boo, dingin pma ninga daa kunong kem yi mi anda yi yaa jeendi tu yi jei, n yaa kasi baa mwatanga yi june, ko mwa ba jaanga songma nyinou ka wuni mwatangu.>>

³³ Kwatimba ya pira kin, <<Yi nyingga wei jeendi tum piyau pina gulai tu yirmanu wei nuwa bu tum boo?>>

³⁴ Yesu pira pma kin, <<Bu boo yi kumaa sono?>>

Pma nyii lee kin, <<Yi boo yi kumaa a nibiyo yi jindi banyina.>>

³⁵ Yesu sa nuwa bu tum bwii kin ba sindi siyendi sima.

³⁶ A de kumaa wu nibiyo wii yi jindi swii a wananga Yamba, a gelenga nyii kwatimba ya, kwatimba ya cwaanga nuwa bwii.

³⁷ Pma jee riyanga mwa mwa. Kwatimba ya kuranga bubiringi tu nyonai a twanga tacingi nibiyo.

³⁸ Kuci nuwa bu je jeendi wa lam tedu ni, yaa muringgi nurumba yi bakwara.

³⁹ Goro pu Yesu tum pma mwatanga, a diiro konggoru a yeri bonggondi Magadan.

16

Nuwa Kasigu somdi yiringi riyandi buri

¹ Parisayo bu kangga yi Sadukayo pma baanga bonggo Yesu palaka ba cuu yo, pma see kin, <<Juku yiri somdi yiri riyandi buri, ka ma baa diyou Yamba wai.>>

² Anda Yesu nyii pma lee kin, <<Ka nyambirangu ningi, bu ce min, <Sima ningu wei teng dingin diyou ninga wing.>

³ Pero yi pinu bu cee min, <Gundu yaru wei, dingin diyou ningi wing pero ninga pitipiti!> Bu kurani tu ningdu wei diyou, anda bu jaanga kurangu tu ningdu wei a daandi su yokoi.

⁴ Mba nuwa bu bwii wa bu sinaa daandi wa, bu yaa gwasi Yamba wa, bu kasi yiri somdi riyandi buri, yaa ku n ningambiri somdi riyandi buri ka gwal tu banabi Yunana.>>

Bur Yesu a du pma mwati.

Yisti Parisayo yi Sadukayo

⁵ Pu kwatimba ya yerongo kalinggu kwii, pma mondo ba de kumaa.

⁶ Yesu sa pma kin, <<Bu ruun tuwe, yi yisti Parisayo yi Sadukayo.>>

⁷ Pma toso gwela yi buri pmai kin, <<A ce yito dingin yi dee bu kumaa kana banyina.>>

⁸ Yesu som tu pma cegi, dingin tono a pira pma kin, <<Dingin ca bu ninggu gwela yi buri mbiri min bu yaa kumaa? Leegu jirau mbiru banyina!

⁹ Lama yoko bu kuran bu ru? Bu dangga bu yi kumaa nuwo wu n jee nuwa tedu nuwo wo ru? Bu kuranga tacingi twangi sono?

¹⁰ Kumaa nibiyo wu n jee nuwa tedu nii woo dong dei? Bu twanga tacingi sono?>>

11 Dingin ca bu yaa kurani min n yaa cegu kumaa? Bu swera buri mbiri bonggo yisti Parisayo yi Sadukayo.>>

12 Kwatimba ya bwii kuranga kin yaa cegu kin ba swera buri pmai bonggo yisti wu miringgi kumaa anda bonggo yiringi tu Parisayo yi Sadukayo jukuri.

Ciyei Bitrus a dwii Yesu

13 Pu Yesu mwati gwei Kaisariya du Pilipi, a pira kwatimba ya kin, <<Nuwa ciyei kin Bol Nere we?>>

14 Pma lee kin <<Bu kangga cee kin ma yoogi Yohanna wu Ningi Batisima, bu kangga kin ma Iliya, bu kangga kin ma Irmiya yikwii ma wu wiino miringgi banabindi.>>

15 A pira pma kin <<Anda mba, bu ce min, mi we?>>

16 Simon Bitrus lee kin, <<Ma Masiya, Bol Yamba wu yi piima.>>

17 Yesu leeman yo kin, <<Ma yoogi wu yi wuure Simon bol Yunana, dingin woo jire yaa ku baa bonggo neru. Mbaa mi wu diyoyou a juku mina.

18 Yoko n sagu mou, ma Bitrus, (pitindi yei twii sweli.) * Ma yoogi sweli du n moru wei ikkilisiya mi, kana boore na gwali.

19 N nyiiminu wei tu wundi nyinoi lau ku diyoyou, kana ca tu ma kwee a sima, a kwauwa a diyoyou, tu ma pera a sima, a perwa a diyoyou.>>

20 Goro yito Yesu sa kwatimba ya kin, ba sari ya kana we kin yo Masiya.

* **16:18 16:18** Pitindi din Bitrus twii sweli

Yesu ce booru yei

21 A toso dwii jore Yesu toso sagu kwatimba ya dak kin, <<Tagi n angge Wurcalima n tii kuule wundu wundu bonggo bagiraa Yudaya wa yi bagiraa kuruwa wa yi kulumba teeringi wa. Tagi nuwa jinggu wei, anda nyangu ku kunong, yo wuni wei yi piima.>>

22 Bitrus wuu yo bonggo a toso yerenggu kin, <<Mbaa Wu Gira! Too na nindi yi mo!>>

23 Yesu waka kau sa Bitrus kin, <<Lamana bonggo mu Balaa buwai! Ma yoogi sweli puti, too dangandi baa bu bonggo Yambau, anda bonggo neru.>>

24 Yesu sa kwatimba ya kin, <<Kana we ka kasi ba pongge, tagi ba kwaa buri yei, ba de yeu you ba pongge.>>

25 Kana we wu kasi ba mira piima ya mandu wei siyau, anda kana we wu mansi yei piima ya dingin mi nyingu wei.

26 Tu nere pulu wei ca ka nyinggi yiringi tu sima mwa mwa anda nyingga bu piima ne? Tu nere nyii wei ca ba waka piima ya.

27 Dingin Bol Nere baa wei yi yilau Mbaa yo yi bacamandi yei, pero nyii wei kana we woriri cimacima yi yiri tu ningai.

28 N woo sagumbiru jire bu kangga boo pitindi pina, yaa ku bwaanu wau kopo ka kwee Bol Nere bagu yi lau you.

17

Buri Yesu waku wa

1 Goro daa nokono Yesu de Bitrus yi Yakubu yi ciya yo Yohanna a geendo cingu ku getenteng pma yi wundu pmau.

2 Pu pma boo pwii Yesu wakuwa, kau you a nyilanggu cika nyanggu, see yo ninga populok rang.

3 Bur kwatimba Yesu wa bu kunong wa bwii ko Iliya yi Musa baanga toso cegu ciyei yi Yesu.

4 Bitrus sa Yesu kin, <<Mbaa Wu Gira a ninga yiro kundi ku yi boo pina! Ka ma lei n menenu wei cukuringi kunong, diino dingin mo, diino dingin Musa, diino dingin Iliya.>>

5 Pu woo cegu ciyei, buri tinene du nyilani baa summo pma, pero miu twiwe tinene dwii kin, <<Tina Bol mi wu n kangni, wu dirangin gaanggu. Bu nuu yo!>>

6 Pu kwatimba ya bwii nuu miu kwii pma nuu gwasi wang pma gonjo kau sima.

7 Yesu baa bonggo pmau a mwaanga pma a ce kin, <<Bu wunongo, Bu nuu yaa gwasi!>>

8 Pu pma wun dwiiyongi pma ko bu kana we bur Yesu.

9 Pu pma julonggu cingu kwii Yesu sa pma kin, <<Bu sar ya kana we tu bu koi kopo ka Bol Nere wuni boore.>>

10 Kwatimba ya pira yo kin, <<Dingin ca kulumba teeringi wa ce kin tagi kopo ka Iliya waatai bati anda Masiya ba baa?>>

11 Yesu nyii lee kin, <<Manggu Iliya baa wei, pero waata wei kana ca mwa mwa.

12 Anda n woo sagumbiru Iliya gicila baa, nuwa yaa ku kuranga yo, pma ningaman yo

kana ca tu pma kasai. Yito mwaa Bol Nere aari tiigu kuulu a wari pmai.>>

¹³ Buri kwatimba ya kuranga kin a cegu ciyei dwii Yohanna wu Ning Batisima.

Yesu yiki wuture a buri babwiyai

¹⁴ Pu pma waatanga buri bonggo nuwau, nere wu kangge baa bonggo Yesu, a kun kwiyou bonggo you.

¹⁵ A ce kin, Mbaa Wu Gira, nuu bunam bol mu! Yi toki pero a tiigu kuuli wang, sii yaringgu bwalau yi gundu.

¹⁶ N demuwe kwatimba ma anda pma jaanga mirgu.>>

¹⁷ Yesu nyii pma lee kin, <<Mba nuwa bu yaa leegu jire wa yi nuwa bu bwiiwa! N singgu wei siyei yi mba kopo pene? N tari wei kanadi yi mba kopo pene? Bu nyiingu wei bwiya woo pina!>>

¹⁸ Yesu yera wutur wii, a twiyo buri bwiya wii swii kinangu a yila.

¹⁹ Bur kwatimba Yesu baanga wulak pira yo kin, <<Dingin ca yi jaanga yikugu wutur wii?>>

²⁰ Yesu nyii lee kin, <<Dingin leegu jire mbiru banyina, n sagumbiru jire ka bu boo yi leegu jire banyina cika gon mustad, bu saru wei cingu kina min, <Mwati pina ma amna pwii!> Mwatir wei. Yaa tu bu puu ninggi.

²¹ Koo duu wutur yaa twii kopo yi kuru yi cooji.>>*

Yesu ce ciyei dwii boori yei dong

* **17:21 17:21** Yaa kana wono lakargar wu murni bonggo ciyei 21.

²² Pu mwa mwa kwatimba ya kuranga burī Galili, Yesu sa pma kin, <<Nuwa curu wei Bol Nere a war nuwai.

²³ Nuwa jiru wei, anda goro daa kunong wunu wei boore.>> Anda kwatimba bwiya gaanggu wang.

Yagu janggal a Laa Yambau

²⁴ Pu Yesu yi kwatimba ya baanga Kaparnahum, nuwa bu yiri janggal Laa Yambau baanga bonggo Bitrus pira kin, <<Kulum mbir yar janggal wu Laa Yambau ru?>>

²⁵ Bitrus lee kin, <<Ong.>>

Pu Bitrus waata miringgi lai, Yesu ninga pira kin., <<Wu yar janggal balamba we? Nuwa bu sima bwii ru? Rungguwa ru? Ma ce min ca Bitrus?>>

²⁶ Bitrus nyii lee kin, <<Tu yar Rungguwa.>> Yesu lee kin, <<Kundi, ma cegu min nuwa bu sima boo pma yaa yari.

²⁷ Anda n yaa kasi yi welaman nuwa boo. Dingin tono mwati you ma manni godim. Ma wuwe, jinde wu ma taa, a nyiyau yau ma nyinggu wei kene du yinno yagu janggal, ma dee, ma ya pma janggal yire.>>

18

Wu gwala yi giru a lau ku diyou we?

¹ A dwii jore kwatimba Yesu wa baanga bonggo you a pingu kin, <<Wu gwala yi gira we a lau ku diyou?>>

² Yesu yiwe babwiya wu banyina a ruwo cudi pma

³ a ce kin, <<N wo_o sagumbiru jire kopo ka bu waka buri bu yoo cika babwiya wu banyina, ka yito ne, yaa wu diru wei lau ku diyou.

⁴ Dingin tono kana we wu cingo dwii yei cika babwiya wu banyina, yoo wei wu gwala yi gira a lau ku diyou.

⁵ Kana we wu yi babwiya banyina cika wuna dingin din mi, a yingge.

Yiringi tu dee welem

⁶ <<Anda kana we wu diini wu wiino miringgi bu nyititi, bu puu jire yi mi wa ba yaranga a welem, kujang nuwa ba kwangman yo nii du duuyi a kwii ba manna miringgi kalinggu ba bwaa.

⁷ Too yiri bunam a sima, dingin nyindi welem tagi ba baa, anda yoo wei yiri bunam a bonggo nere wu de yari.

⁸ <<Ka wai mau yi naa mau diiminu wei welem wai, ma mwar ya, ma man siyei! Kujang ma nyingga piima bu yaa matigu wa, yaa wari yi mwari yi ku nuwa manu wei mwa mwa wari mai yi mwar mai miringgu bwalau ku yaa dumdu.

⁹ Ka nung mo diimini wei welem wai, podo ma man siyei! Kujang ma nyingga piima yi nung wiino yi ku nuwa manminu wei yi nundi rop a bwalau ku yaa dumdu.

Balangu ciyei a dwii puure wu liya

¹⁰ <<Suwa kii, bu cedi ya kana we cu_u bu nyititi boo. N wo_o sagumbiru bacamandi pmai su diyou kana pene pene boo gawuri Mbaa mi wu diyou.

11 * Bol Nere baa dingin ba mira pma bu liyanggi wa.

12 Bu dangani min? Ka nere wu kangge woo yi puuri woon anda wu wiino liyari, na dur su kun toro sur toro swii a taagu taawu a cingu, ba mwati ba kasanga puure wu wiino wu liya wii ru?

13 Ka nyingai, n sagumbiru jire ninggu wei buru degdeg a dwii puure wiino wii gwalu wei su kun toro sur toro su liyani bu swii.

14 Yito mwaasi, Mbaa mbire wu diyou yaa kasi kana wiino miringgi bu nyititi boo ba liyanga.

Bagon mo wu ningamin welem

15 Ka bagon mo ningamin welem, ma amna bonggo you ma juku yo liyari yei, dwii mbir rop tibak. Ka kar twiyau ma mira bagon mo.

16 Anda ka, ka bu twiyau ne ma de nere wiino kana nuwa rop kem yi mo, palaka kana ca tu ma see ba yoo jire a cudu nuwa rop kana kunong bu twii seedaki bwii.

17 Pero ka kwa kagu twiyau ma dee bonggo ikkilisiya, ka kwaa kagu twiyau ikkilisiya, bu dee twii nere wu som bu Yamba yi nere wu yiri janggal.

Tu nuwa kwee yi tu nuwa pera

18 <<Pero n woo sagumbiru jire kana ca tu bu kwee a sima a kwauwa a diyou tu bu pera a sima a perwa a diyou.

19 <<Bambang n cwatugu sagumbiru, kana pene pene ka nuwa rop cudu mbiri neci dwii a

* **18:11 18:11** Yaa kana wono lakargar wu murnu bonggo ciyei 11. Cika Luka 19:10

pinaa si_{ma}, ce ku_{ru} a dwii kana ca Mbaa mi wu diyou ni_{nga} mbi_{ru} we_i.

²⁰ Dingin pu nu_{wa} rop kana kunong ku_{ranga} bu_{ri} yi₁ di_n mi, n woo₂ kem yi₁ pma.>>

Balanggu ciye_i a dwii kewe wu yaa par sukom

²¹ Bur Bitrus baa bonggo Yesu a pi_{ra} ki_n, <<Mbaa Wu gi_{ra}, n paramanu we_i bago_n mi sukom daa sono, ka ni_{nga} ngin we_{le}m? Daa nibiyo ru?

²² Yesu nyii lee ki_n, <<Yaa yi_{to}, yaa daa nibiyo, anda kun nibiyo daa nibiyo.

²³ Dingin to_{no} lau₁ ku diyou ci_{ka} balaa wu kangge wu kasi₁ ba su_{wa} gi_{na} yo₁ wu bonggo kewaa ya.

²⁴ Pu toso sugu, nu_{wa} demu_{we} yo₁ kewe₁ yo₁ wu pong talenti₁ tedu kwap.†

²⁵ Kewe₁ wii yaa ku pu bu yagu ci_n dwii, dingin to_{no} nere wu gi_{ra} yo₁ wii a diina nu_{wa} ba tee₁ ba cuu yo₁ kem yi₁ nu_{ru} yo₁ yi₁ kwaraya yi₁ mwa mwa yir_ingi₁ tu woo₁ yi₁ to_{no}i₁ ba ya ci_{ne} dwii.

²⁶ Kewe₁ wii a yara kun kwiyu yi₁ dinendi a gawuri₁ balaa a ce₁ ki_n, <Ni_{nga} kanadi yi₁ mi, n senggu mau, n yami_{nu} we_i kana ca!>

²⁷ Nere₁ wu gi_{ra} yo₁ wii nuu₁ bunam yo₁, a duu ci_n dwii, a dwiya mwati.

²⁸ Bur nere₁ wii baa kaanga yi₁ basi_n wurai₁ yo₁ wu kangge wu pong yo₁ dinari woo_n. A tee₁ kwii₁ a cegu₁ ki_n, <Yangge ci_{ne} mi!> ‡

† **18:24 18:24** Talenti tedu kwap, tum you lam ken wurai neri, nyan mila kuna rop a dwii jore ‡ **18:28 18:28** Dinari twii ken wurai neri a nyan kiino a dwii jore

29 Basin wurai yo a kun kwiyoyi dinendi a gawuri yei a senggo kin, <Ninga kanadi yi mi, n yaminu wei!>

30 Anda a kwaa, waka a dee manna jarum kopo ku ya yo cine yei.

31 Ku kewaa bu kangga bwii ko tu ning wai gaanggir pmai bwiiwa, pma aanda sa nere wu gira pma kana ca tu ning wai.

32 Nere wu gira wii yiwe kewee wii a see kin, <Ma kewee wu yi tuwe, n yapa min cine mai mwa mwa, dingin ma sengangge.

33 Daabu na ma nuu bunam bagon mo kewee cika ku n nuu bunam mau ru?>

34 Nere wu gira yo wii suko wang, a manni kewee wii jarum, nuwa ba turongo kopo ka yar cine dwii mwa mwa.>>

35 <<Too tu n Mbaa mi wu diyou ninga manu wei kana wono mbire kopo ka bu paraman sukom kambaa yi gaanggu kiino.

19

Jigu laabwiya

1 Pu Yesu mata cegu too yiringi, a du Galili mwati sima Yudaya bonggo wu kangge wu you ku Urdun.

2 Nuwa tum pong yo pwii a mira pma yilanga.

3 Parisayo bu kangga baanga bonggo you ba cuu yo, pma pira kin, <<Teere lee kin nere ba ji laabwiya nure yo dwii kana ca ru?>>

4 A nyii lee kin, <<Bu ce bu tu balgi ru? <Yake toson taawu Yamba ruu pma nambare yi nure,>

⁵ pero a ce kin, <Dingin tono nere dur wei mbaa yo yi njaa yo ba neca buri yi nure yo pma bu rop boo yoo wei buri kiino.>

⁶ Pma yaa rop mere anda buri wiino. Dingin tono tu Yamba neca nere ba cwaani ya.>>

⁷ Pma pira kin, <<Dingin ca Musa sa pma kin nere ba nyii nure yo lakargar jigu laabwiya anda ba mana?>>

⁸ Yesu nyii lee kin, <<Musa leembira bu ji laabwiya nurumba mba dingin gaanggir mbiri cingcing. Anda gwak yaa yito yake taa you.

⁹ N woo sagumbiru min, kana we wu man nure yo ka yaa dwii taari ne, ka yikir nure wu kangge a ninggu taari yi yo.>>

¹⁰ Kwatimba ya see kin, <<Ka cudu nure yi bwiya te yito wei, kujang nere ba ningi yaa laabwiya.>>

¹¹ Yesu sa pma kin, <<Yaa kana we wu lee wei yi doo ciyei, kopo pma bu Yamba kalanga pma wa.

¹² Bu kangga ninga bu laabwiya dingin twii pole, nuwa bi pma yi twii, bu kangga nuwa diin pma, pero bu kangga dingin lau ku diyou. Anda kana we wu lee wei yi do ciyei, ba lee yi tono.>>

Bakwaraa yi Yesu

¹³ Nuwa bu kangga dee bakwaraa bu nyititi wa bonggo Yesu ba cerman pma wari ba cerman pma kuru. Anda kwatimba ya yera pma bu dee bwii.

¹⁴ Yesu ce kin, <<Bu du bakwaraa bu nyititi wa ba baanga bonggo mu bu jari ya pma, dingin lau ku diyou kwii ku pma bu cika bakwaraa wa.>>

¹⁵ Pu cerman pma wari, a mwati.

Bwiyaka wu yi gina

16 Nere wu kangge baa bonggo Yesu a pira kin, <<Kulume, tu nyaayi yei ca tu ningu wei palaka n nyingga piima bu yaa matigu wa?>>

17 Yesu nyii lee kin, <<Dingin ca ma pirangge tu nyaayi? Wu nyaa wiino tibak, ka ma kasi piima bu yaa matigu, ma ninga pongondi yi teeringi.>>

18 Nere wii pira kin, <<Twii, tonon?>>

Yesu nyii lee kin, <<Ma jiri ya nere, ma ningi ya taari, ma ningi ya kuwii, ma nyii ya seedaki leendi,

19 ma nyii giru mbaa mo yi njaa mo, pero ma kangman bapun mo cika buri mai.>>

20 Nere wii ce kin, <<N pong too teeringi mwa mwa, tu nyona ca?>>

21 Yesu nyii lee kin, <<Ka ma kasi ma yoo nere wu twanga wei, mwati ma cuu gina mo ma cwaanga bakuuluwa, ma nyinggu wei gina a pwii diyou Yambau. Anda ma baa ma pongguwe.>>

22 Pu bwiyaka wii nuwa yito, a mwati yi bwiyang gaangu, dingin yi gina wang.

23 Yesu sa kwatimba ya kin, <<N sagumburu jire, ning wei buu wang nere wu yi gina ba diiro lau ku diyou.

24 Pero n sagumburu, ning wei leelee nggela ba diiro bou lippirau, yi ku bagina ba diiro lau Yambau.>>

25 Pu kwatimba ya nuwa yito, pma riyanga buri wang pero a pira kin, <<Ka yito wei wu nyinggu wei mirma we?>>

²⁶ Yesu suwa pma a ce kin, <<Too gwala dimbiri neri, anda yaa tu gwala dimbiri Yambai.>>

²⁷ Bitrus lee kin, <<Yi du kana ca yi pongmina. Tu yi kinggu wei ca?>>

²⁸ Yesu sa pma kin, <<N sagumburu jirei, jor du kana ca waatu wei buri puci, pero pu Bol Nere siinu wei candu lau you ku yi yilau, mba bu ponggu wa bu siinu wei cannindi lauri kwap sur rop bu ningamanu wei bali duuri kwap sur rop tu Israila.

²⁹ Anda kana we wu du laandi kana ciyamba bu nambirmba kana nurumba wa, kana mbaate kana njaate kana kwaraa kana koondi dingin mi nyingu wei tum you daa woon pero nyingu wei piima bu yaa matigu wa.

³⁰ Anda nuwa tum bu gawuriyo wa, yoo wei bu goroyo wa, pero nuwa tum bu goroyo wa yoo wei bu gawuriyo wa.

20

Balanggu ciyei a dwii bawura

¹ <<Lau ku diyou cika nere wu yi kondou wu twiyo yi pinu kilang a nyii nuwa wurai a kondou you.

² A nuwanga yaru wei pma dinari a nyangu, a teni pma kondou you.

³ <<Ku jor du toro ninga a twiyo a ko bu kangga pisindi lummo yaa tu ninggi.

⁴ A sa pma, <Mba mwa bu ambira bu ninga wurai a kondou mu, n ya mbiru wei tu daayai.>

⁵ Dingin tono pma aanda ba ninga wurai a kondou wii.

<<Yo pero mwati yi cudi nyangu yi jor du kunong dong, a ninga cika ku conggo nuwanga.

⁶ Pu jor du nuwo wu nyambirangu ningau, pero a twiyo a nyingga bu kangga pitindi. A pira pma kin, <Dingin ca bu pitindi pina yaa tu bu ninggi nyangu mwa mwa?>

⁷ <<Pma nyii lee kin, <Yaa nere wu dee yiro wurai.>

<<A sa pma kin, <Mba mwaasi bu ambira bu ninga wurai a kondou mu.>

⁸ <<Pu nyambirangu ningau nere wu kondou weyou yiwe nere wu sugu kondou a see kin, ba yiwe nuwa bu ninggu wurai bwii, toso bu baa yi gorou wa a bee bu gawuriyo wa.>

⁹ <<Nuwa bu toso wurai jor du nuwo wu nyambirangu pma baanga nuwa nyii pma dinari.

¹⁰ Dingin tono bu nuwa nyii wurai gawuriyo wa, pma baanga dangani kin nuwa yaru wei pma tum gwala wei bu goroyo wa. Anda kana wono pmo nuwa nyii dinari.

¹¹ Pu nuwa nyii pma nyina, pma toso jangga ceu bonggo nere wu siima boo ya.

¹² Pma ce kin, nuwa bu baa yi goro boo pma ninga wurai nyan jor du wiino anda bu ya yiro kiino yi pma yo bu yar nyangu wurai wa.>

¹³ <<A sa wu kanggi pma kin, <Basin mi, yaa ku n ninga dwal jire. Ma lee bu min ma ninggu wei wurai nyan dinari ru?

14 Ma yi tu nuwa ya mina ma mwatanga. N kasi n ya nere wu baa yi goro yito mwaasi cika ku n ya mina.

15 N puu ninggu tu n kasi yi ken mi ru? Ma ninggu bwiu dingin mi nij ru?

16 <<Dingin tonu, nuwa bu goroyo wa, yoo wej bu gawuriyo wa, pero nuwa bu gawuriyo wa yoo wej bu goroyo wa.>>

Yesu ce ciyei a dwii boori yei ku kunong

17 Pu Yesu woo mwatugu Wurcalima, a de kwatimba ya bu kwap sur rop bwii a bonggo a sa pma kin,

18 <<Yi mwatangu Wurcalima anda nuwa cuuru wej Bol Nere bonggo bagiraa kuruwa yi kulumba teeringi wa. Pma mwarmanu wej yo bal boori,

19 ba nyii yo war nuwa bu yaa yoogi nuwa bu Yudaya wa, pma ningamanu wej yo nyasi, waciru wej pero piini wej yeu. Nyangu ku kunong wuni wej yi piima.>>

Senggo njaa Yakubu yi Yohanna

20 Goro yito njaa kwaraa Sabadi baa gawur Yesu kem yi kwaraa ya a kun kwiyei a senggo yo ba ningaman yo yiri tu kanggi.

21 Yesu pira kin, <<Tu ma kasigu ca?>>

A see kin, <<Ma nyii kwaraa muwa bu rop binaa pisu wu nyaayi a lau mau, wu wiino a wai mau wu jeu wu kangge a wai mau wu miyu.>>

22 Yesu sa pma kin, <<Bu som bu tu bu senggu. Bu puu wej tiigu kuule wu n tii wej ru?>>

Pma leeman yo kin, <<Yi puu wej.>>

23 Yesu sa pma kin, <<Bu tii wei kuule wu n tii wei. Anda n yaa dimbire n seka wu sinu wei wai wu jeu mu kana wai wu miyu mu. Soo pisindi kopo bu Mbaa mi meneman pma wa.>>

24 Ku kwatimba bu kwap bwii nuwa yito pma sukongo yi ciyamba bu rop bwii.

25 Yesu yiwe pma mwa mwa a ce kin, <<Bu soma nuwa bu jeegi lau dwii nuwa bu yaa yoogi nuwa bu Yudaya wa jukur nuwa pma lau pero bagiraa pma jee lau dwii pmai.>>

26 Anda yaa yito yi mba. Wu kasi ba yo wu gira a cudi mbiri, ba yoo kewe mbire.

27 Kana we wu kasi ba yoo wu gawuriyo tagi ba yoo kewe mbire,

28 cika ku Bol Nere baa bu nuwa ba yoo kewaa ya anda a baa ba yoo kewe nuwa pero ba nyii piima ya, palaka ba mira nuwa tum.

Kerma rop ko sima

29 Pu Yesu yi kwatimba ya dugu Yeriko, nuwa tum pong pma.

30 Kerma rop pisindi gingu nyinou, pu nuwa kin Yesu cwigu, pma ninga duwai kin, <<Mbaa Wu Gira, Bol Dawud, nuu bunam yiru!>>

31 Nuwa bu kuranggi buri bwii a yera pma ba sin siyendi tok, anda pma cwata duwai kin, <<Mbaa Wu Gira, Bol Dawud nuu bunam mu.

32 Yesu a tin tiyau a yi pma, a sa pma kin, <<Tu bu kasi n ningambira ca?>>

33 Pma leeman yo kin, <<Mbaa Wu Gira yi kasi yi ko sima.>>

34 Yesu nuu bunam pmaw, a mwaanga nundi pmai. Yoko yoko pma ko sima, pma pong yo.

21

Yesu aara Wurcalima

¹ Pu Yesu yi kwatimbaya ninga nem
Wurcalima pma baanga gwei Betpaji a dwii Cing
Souri Setun, Yesu tum kwatimba ya rop,

² a sa pma kin, <<Bu ambira gwei du gawuri
mbiri, ka bu tengma bu kwee wei bakoro twalgi
pwii, yi twiyaa yo bonggo you. Bu pera bu
dengguwe.

³ Ka kana we sambir ciyei, bu see min, <Mbaa
Wu Gira kasigu,> dumbiri wei bu dee yoko yoko.

⁴ Too yiringi ningwa, palaka ba twanga tu
banabi cei,

⁵ <<Bu sa nuwa bu Wurcalima min,
<Bu ko, balaa mbire baaggu
yi dwii du cinggai geenggi a dwii bakoro,
a dwii twiyaa bakoro.>>>

⁶ Kwatimba ya bwii mwatanga ninga cika ku
Yesu sa pma.

⁷ Pma dee bakoro yi twiyaa bakoro, pma
kenaman gatanggamandi pmai dwii bakori swii,
Yesu siina dwii gatanggamandi twii.

⁸ Nuwa tum ninga pu kenenggu
gatanggamandi pmai a nyinou a gawuri yei,
anda bu kangga pma kaca yendi souri a
kenamana nyinou.

⁹ Nuwa tum bu gawuri yei wa yi bu ponggu yo
goro wa, pma ninggu duwai kin,
<<Yi teranga bol Dawud!

Wuure bonggo yo wu bagu miringgi din Mbaa
Wu Girai,

Yi teranga Yamba wu woo diyou.>>

10 Pu Yesu diiro Wurcalima, mwa mwa gwei dwii piro, a ninggu pira kin, <<Woo we?>>

11 Nuwa bu tum bwii nyii lee kin, <<Woo Yesu banabi wu baa Nasaret du Galili.>>

Yesu miringgi Laa Yambau

12 Yesu diiro Laa Yambau a kekenga nuwa bu cuugu yi tenggu yiringi wa a pwii. A sukaman siyau tebur nuwa bu waki ken wa, yi pisindi nuwa bu cuugu bamori Masar wa.

13 A sa pma kin, <<Balg, laa mu nuwa yiri wei kin, laa kuru, anda mba bu dee bu yo laa kuuwau.>>

14 Kermo yi guwongi baanga bonggo yo a laa Yambau, a mira pma yilanga.

15 Pu bagira kuruwa yi kulumba teeringi wa ko yiringi riyandi buri tu ningai pero nuu tu bakwara bu ninggu buri degdeg a miringgi laa Yambau cegu kin, <<Yi teranga Bol Dawud, Hossana!>> Pma sukongo.

16 Pma pira kin, <<Ma nugu tu bakwara boo cegu ri?>> Yesu nyii lee kin, <<Ong, yaa ku bu ce miringgu lakargar ru? <Wii mo ma juku bakwaraa bu nyititi wa yi bweegaa ba tera mina.>>>

17 A du pma mwati gwei Betani a daa pwii.

Yesu semtanga sou pwalgu

18 Yi pinu kilang, pu waatigu gwei Yesu nuu june.

19 A ko sou pwalgu ku kanggu a nyinou a aara bonggo you anda yaa tu nyinggai bur wandi. Bur a ce kin, <<Yama ma peri ya twiyagu mere!>> Buri sou kwii kusuwa kinangu.

20 Pu kwatimba ya ko yito pma riyanga buri, Pma ninga pira kin, <<A ningwa nye sou pwalgu koo kusuwa kinengu yito?

21 Yesu nyii pma lee kin, <<N woo sagumbiru jirei, ka bu lee jire, bu ninga bu gaanggir rop ne, bu ning wei tu ningwa yi sou pwalgu koo, anda buri too yi wundu ne, bu saru wei cingu kina min, <Mwati, ma manni buri mai kalinggu,> ningdu wei.

22 Ka bu lee jire, kana ca tu bu senggo miringu kuru bu kinggu wei.

Pira dwii dimbire Yesu

23 Yesu diiro laa Yambau, pu woo jukugu yiringi nuwa, bagiraa kuruwa wa yi bagiraa nuwa wa a baanga bonggo you, pma pira kin, <<Ma ninggu too yiringi yi dimbire we? Pero wu nyiimin woo dimbire we?

24 Yesu nyii pma lee kin, <<Mi mwa n pirambiri wei pira wiino, ka bu nyiinggi lee n sambiri wei, ka ninggu tina yiringi yi dimbire we wei.

25 Dimbire wu Yohanna Ningi Batisima yi tono, a baa piyau, a baa diyou ru? A baa bonggo nere ru?>>

Pma ninga pu dangandi a cudu pmai kin, <<Ka yi ce min, a baa diyou, pirayiri wei kin, <Dingin ca bu kwaa leegu jire yi yo?>

26 Anda ka yi ce min, <A baa bonggo neru,> yi nugu gwasi nuwa dingin pma mwa mwa lee kin Yohanna twii banabi.>>

27 Dingin tono pma nyii lee Yesu kin, <<Yi som bu.>>

A sa pma kin, <<Mi mwa n sambire ka n ninggu too woo yi dimbire we wei.>>

Balanggu ciyei a dwii bakwara rop

²⁸ <<Bu danggu wei min ca, a dwii ciyei dina? Woo yi nere wu yi ba kwaraa rop. A aara bonggo wu gawuriyo a see kin, <Amna ma ninga wurai a kondou.>

²⁹ A nyii lee kin, <N anggi.> Anda cwata gorou a waka dangandi yei a aara.

³⁰ <<Mbaate wii aara bonggo wu kanggi wii a see cika ku conggo ceu, a lee man yo kin, <N anggu wei mbaa,> anda yaa ku aarau.

³¹ <<Wu ninga tu mbaa pma kasigu we cudu pmai?>>

Pma nyii lee kin, <<Wu gawuriyo wii.>>

Yesu sa pma kin, <<N woo sagumbiru jire nuwa bu yiri janggal yi karmajindi gicila mbir wei tengma lau Yambau.

³² Dingin Yohanna baa ba juku mbir nyinou ninggu pisu wu nyaau a gawuri Yambai, bu kwaa leegu jire, anda nuwa bu yiri janggal wa yi karmajindi pma lee. Pero kana pu bu ko too yiringi bu kwaanga bwiiwa yi leegu jire yi yo.

Balanggu ciyei a dwii nere wu nyii kondou inabi

³³ <<Bu ka twiyau ciyei du balanggai du kanggi. Woo yi nere wu kangge wu yi kondou, a ruu souri inabi. A wora yi garu. A wul bou dudu a sweli du karkar pu nuwa yamnu wei gundu inabi pero a moo cire. Bur a duu bajomba bu kangga a ninga songma.

34 Pu jor wagu inabi ningau, a tum kewaa ya a bonggo bajomba bwii, ba yimuwe yo tutwiyari inabi.

35 Bajomba bwii ta kewaa bwii, pma buwanga wiino, a ji wu kangge pero bacanga wu kunong.

36 Bambang a tum kewaa bu kangga bonggo pmau gwala bu gawuriyo wa, bajomba bwii ninga cika ku conggo ningau,

37 Cwata gorou a tum bol yo bonggo pmau. A ce kin, <Pma nyii wei giru yake ku twii bol mi ko.>

38 <<Pu bajomba bwii ko bwiya wii bagu, sa buri pmai kin, <Suwa nere wu kondou wuna yoo wei weyau woo baayi, yama yi jiyo palaka gina yo ba yoo woyire.>

39 Dingin tono pma ta yo, a baciwe siyei goro kondou wii, a jiyo.

40 Dingin yito ka nere wu kondou wayau baayi, ninga wei nye yi bajomba bwii?>>

41 Pma ce kin, <<Nere wii baa lacuwei bajomba bu bwiiwa bwii yi boori du yi buwi, ba nyii kondou wii bajomba bu kangga bu nyii wei yo tutwiyari kondou wa ka jor wagu ningi.>>

42 Yesu sa pma kin, <<Bu ce bu miringgu Lakargar Yamba ru?

<Sweli du mweemba kwaanga,

a yoo sweli du nyaayi du mweemba cenna gengelte.

Too ninggu Mbaa Wu Gira,

too yiringi riyandi buri a nundi yiri.>

43 Dingin tono, n sagumbiru nuwa demanu wei lau Yambau bonggo mbiru, ba nyii nuwa bu twiya wei tutwiyari yei.

44 Kana we wu yaramana swele dwii repuru wei cuk cuk, pero ka swele dwii yarman kana we, koo wei pwangge lingling cika miima.>>

45 Pu bagiraa kuruwa yi Parisayo nuu ciyei du balanggai du Yesu cei, pma kuranga kin a cegu pma.

46 Pma kasa ba ta yo, anda pma nuu gwasi nuwa dingin pma dee twii banabi.

22

Balanggu ciyeu a dwii waandi laabwiya

1 Yesu sa pma ciyei du balanggai dong kin,

2 <<Lau ku diyou cika balaa wu ninga waandi laabwiya bol yo.

3 A tum kewaa ya ba sa ciyei nuwa bu yo yiwe wa ba baanga waandi swii anda pma kwaanga baaggu.

4 <<A pero tum kewaa bu kangga a ce kin, Bu sa pma bu nuwa sa pma ciyei wa min n mata menenggu jeendi. N laca gomtorongi yi tanggi mi su mwalanggi, kana ca menenggi. Bambe waandi laabwiya.>

5 <<Anda pma yaa ku ka twiyau, pma mwatanga, bu kangga aanda kondou, bu kangga aanda lummo.

6 Bu kangga taa kewaa bwii a turongo pma, a laca pma.

7 Balaa wii suko wang. A tum kacara ya laca nuwa bu laca kewaa bwii, a taa gwei dwii mwa mwa.

8 <<Pero a sa kewaa ya bu tuma bwii kin, <Waandi laabwiya sina cipigi anda nuwa bu n

gicila n tum man pma wa pma yinnibu ba baanga.

⁹ Ambira nyindi su miringgi gwei bu sa ciyei kana we wu bu nyingga ba baa waandi sina.>

¹⁰ Dingin tono kewaa bwii mwati a ponggu nyindi a kuranga nuwa mwa mwa bu nyingga wa, bu nyaa wa yi bu bwii wa, laa laabwiya twangwa yi rungguwa.

¹¹ <<Pu balaa diiro ba ko rungguwa, a ko nere wu kangge wu yaa see laabwiya.

¹² A pira kin, <Basinte, a ning wei nye ma dimmuwe pina yaa see laabwiya?> Nere wii yaa puuna.

¹³ <<Balaa wii sa kewaa ya bu sugu pma bwii kin, <Twala wari yi mwari ma yikiyo twalange ma manna pu yi kumjila, pma jii wei wiindi yi dumonggu nyiyau.>

¹⁴ <<Nuwa bu nuwa yiyanga wa tum, anda bu nuwa seka wa banyina.>>

Yagu janggal Balaa Kaisar

¹⁵ Buri Parisayo twiyongo twalange a kasa nyindi, ba ciman Yesu tandau a bonggo ceu yei.

¹⁶ Pma suka kwatimba pma kem yi nuwa Hiridus wa pma ce kin, <<Kulume, yi soma mai jire. Pero ma jukur nyinou Yambau yi jire, ma yaa seki nuwa, ma de nuwa mwa mwa waiyou wiino.>>

¹⁷ Yoko sa yiro, a kogu mou cimacima yi ya janggal Balaa Kaisar ru, ba yari ya ru?>>

¹⁸ Yesu som dangandi pmai tu bwii, a ce kin, <<Mba nuwa bu yi batal wa, dingin ca bu kasi bu ciingin mu tandau?

19 Bu jukunggi ken du nuwa yari janggal dwii.>> Pma de nyiia,

20 a ce kin, <<Wekilei yi din dinaa du wei?

21 Pma ce kin, <<Doo du Balaa Kaisar.>> A sa pma kin, <<Bu nyii Balaa Kaisar tu yoogi tu Balaa Kaisar, pero bu nyii Yamba tu yoogi tu Yambai.>>

22 Pu pma nuwa yito pma riyanga buri. Dingin tono pma mwatanga.

Pira dwii wunonggu boore

23 A dwii nyanggi Sadukayo pma bu ce kin, wunonggu booru ya, pma baanga bonggo you yi pira.

24 Pma ce kin, <<Kulume, Musa sa yiro kin ka nere boori yaa kwaraa ne, tagi ciya yo ba yiki wutukolo wii palaka ba biman kwaraa ciya yo.

25 Boo yi nuwa bu kangga nibiyo twii ciyamba buri a cudu yiri. Wu gira pmo ninga laabwiya a bwaa, yake ku yaa kwaraa a du nure yo ciya yo.

26 Yito mwaasi a ningi wa yi wu rop yi kunong be wu nibiyo yei.

27 Cwata gorou you, nure wii bwaa.

28 Yoko sa yiro, yake ku ning pma mwa mwa pmau nibiyo ko, a nyanggu wunggu boore, yoo wei nure we?>>

29 Yesu nyii lee kin, <<Bu liyanga dingin bu som bu tu Demteere ciyei, pero bu som bu dimbir Yamba.

30 Nyanggu wunonggu boore, nuwa na ningi laabwiya, kana ba nyii laabwiya, pma yoo wei cika bacamandi a diyou Yambau.

31 Anda dwii wunggu boore, bu ce bu tu Yamba sambira ru? Yamba sambira kin,

32 <Mi n Yamba wu Ibrahim, Yamba wu Icahu, Yamba wu Yakubu.> Yo yaa yoogi Yamba wu nuwa bu bwaanggi wa, yo yoogi Yamba nuwa bu yi pijima wa.>>

33 Pu nuwa tum nuwa yito pma riyanga buri yi yiringi tu jukuya.

Teere du gwala yi giru

34 Pu Parisayo nuwa kin Yesu diini Sadukayo sindi siyei tok, pma kuranga buri.

35 Wu wiino pmo wu som teeringi wang, a cuu yo yi wuna pira.

36 <<Kulume, miringgi teeringi du gwala yi giru dono?>>

37 Yesu nyii lee kin, <<Ma kangman Mbaa Wu Gira Yamba mo yi gaangu mou mwa mwa, yi bawei mai mwa mwa yi dangandi mai mwa mwa.

38 Too teere du gawuriyo yi du gwala yi giru.

39 Du rop yei cika doo mwaasi, <Ma kangman bapun mo cika buri mai.

40 Teeringi yi yiringi tu banabindi jukuri mwa mwa daangi laa teeringi tu rop too.

Kristo too bol we

41 Pu boo Parisayo boo kuranggi buru, Yesu pira pma kin,

42 <<Bu dangani ca dwii Masiya? Yoogi bol we?>>

Pma nyii lee kin, <<Too bol Dawud.>>

43 A sa pma kin, <<Dingin ca ki, Dawud ce ciyei yi dimbire Bawei du Walwal, a yigu Masiya kin Mbaa Wu Gira? Dingen a ce kin,

44 <<Mbaa Wu Gira sa Mbaa Wu Gira mi

<Sin siyei wai mu wu jeu kopo ka n diini bacemba ma kuu mou.>>>

45 Ka Dawud yi Masiya kin, Mbaa Wu Gira wai, <<A ningwa nye ba yoo bol yo?>>

46 Yaa wu pun ciyei, yake kwii nyangu yaa wu pero ninggu ma yo pirandi.

23

Yesu tukulanga kulumba teering wa yi Parisayo

1 Yesu sa nuwa tum yi kwatimba ya kin,

2 <<Kulumba teeringi wa yi Parisayo bwii pma bu jukuri pitindi teeringi Musa.

3 Dingen tono bu ninga pongondi yi kana ca tu sa mbirai, bu ningi ya tu pma ninggi, dingin pma yaa pongi tu pma wasigi.

4 Pma der see wu komburum ba cerman nuwa, anda pma yiri pmai yaa lee mwanngu yi wai.

5 Pma ningi kana ca palaka nuwa ba ko. Pma bali ciyei Yambai ba cwaki balayandi gembirendi yi tono ba bongna dwii, pero cwaki nyandi gatanggamandi pmai cokurondi.

6 Pma kasi pisindi bagirai a jor waandi, yi pisindi su kundi wang a girindi kuru.

7 Pma kasi nuwa ba ci pma a lummondi pero nuwa ba yi pma kin kulumba.

8 <<Anda mba, bu lee ya nuwa ba yi mbira kin, <Kulume,> dingin bu boo kulum wiino tibak pero bu yoogi ciyamba buri.

⁹ Pero bu yirya kana we a sima min, <<Mbaa,> dingin bu boo yi Mbaate wiino tibak a diyoyou.

¹⁰ Kana mba, bu lee ya nuwa ba yi mbira kin, <Kulume,> dingin bu woo yi kulum wiino tibak, wii Masiya.

¹¹ Wu gwala yi gira cudu mbiri ba yo kewe.

¹² Dingin kana we wu wun dwii yei nuwa cingo wei anda kana we wu cingo dwii yei nuwa nyii wei giru.

¹³ <<Bu yoogi yiri bunam, mba kulumba teeringi wa yi Parisayo, mba bu yi batal wa! Bu laka nyinou lau ku diyoyou a bonggo nuwau, mba yir mbiri dong bu teembiri bu pero bu du pma bu teendu wei wa ba teendo. [

¹⁴ Bu yoogi yiri bunam, mba kulumba teeringi wa yi Parisayo, mba bu yi batal wa! Bu ningaman wutukola lelu, ba yi see wu laandi pmai, pero ce kuru cokurok cika nuwa bu nyaa wa. Boo nuwa tii wei kuulu wang.]*

¹⁵ <<Bu yoogi yiri bunam, mba kulumba teeringi wa yi Parisayo mba bu batal wa, bu kereni kana piyau a sima yi you ku piu palaka bu wuu nere wiino ba pong mbira, pero ka baayi, bu dina ba yo bol bwalau gwala mbira daa rop.

¹⁶ <<Bu yoogi yiri bunam, mba kerma bu taagu nuwa wa! Bu ce min, <Kana we ka wereni yi laa Yambau too yiri tu kanggi ne anda ka kana we wereni yi sinariya wu laa Yambau, tiini wera yo.>

* **23:14 23:14** Lakargarindi su kanggi yaa ku bala bonggo ciyei kwap sur nii!

17 Mba bacinba kerma wa, tu gwala yi giru tonono? Sinariya ru, laa Yambau yo wu diini sinariya ba ninga walwal ru?

18 Bambang bu ce min, <Kana we wu werenga yi kwaare Yamba too yiri tu kanggi ne, anda kana we wu werenga yi nii du miri, tiini wera yo.>

19 Mba nuwa bu yoogi kerma, tu gwala yi giru tonono? Nii ru, kwaare du diini nii ba ninga walwal ru?

20 Dingin tonono kana we wu werenga yi kwaare werenga yi kana ca tu miri.

21 Kana we wu werenga yi laa Yambau a werenga yi tonono yi wu sii miri.

22 Kana we wu werenga yi diyou Yambau a werenga yi candu Lau Yambau yi wu siini miri.

23 <<Bu yoogi yiri bunam, mba kulumba teeringi wa yi Parisayo mba bu batal wa. Bu nyii tiino miringgi kwap wu see ali mbire, baabu, dauri, yi waasa yi bunggul, anda bu kwaa tu gwala yi kundi you, bu tungu jirei yi bunam yi ninggu yiringi cimacima. Too tu daa yei na bu ninga, bu dur ya tu conggoi.

24 Mba kerma bu taagu nuwa wa, bu tosi gundu dingin bu yiki gumpi su kitindi anda bu mii nggela.

25 <<Bu yoogi yiri bunam, mba kulumba teeringi wa yi Parisayo, mba bu batal wa. Bu cardi gorou kaagu yi gorou panane anda miringgi yei twangi yi yawo yi ninggu tu gaanggu mou kasi.

26 Kerma Parisayo wa! Bu car miringgi kaage yi panane bati, palaka gorou you ba ningi wei

walwal mwaasi.

²⁷ <<Bu yoogi yiri bunam, mba kulumba teeringi wa yi Parisayo mba bu batal wa! Bu cika purongi tu nuwa banni tone du populok, kogu you kundi a twalange anda miringgi yei twanggi yi kuri nuwa bu bwaanga wa, pero kana ca yaa walwal.†

²⁸ Bu yito, a twalanga bu cika nuwa bu ninggu pisu wu nyaau wa bonggo nuwau anda miringgi mbiri twanggi yi batal yi tuwe.

²⁹ <<Bu yoogi yiri bunam, mba kulumba teeringi wa yi Parisayo mba bu batal wa, bu mween dwiiyongi purongi banabindi, pero bu yekiri purongi nuwa bu nya wa.

³⁰ Pero bu ce min, <Ka na yi boo jor kwiimba yuwa wei, na yaa ku yi necu wei dwii yi pma yi laca banabindi.>

³¹ Yito mwa bu jukuya min bu yoogi kakaa pma bu laca banabindi wa.

³² Bu jee gawure bu twanga wurai du kakaa mba toso.

³³ <<Mba coogindi, mba kwaraa bageci wa! Nindu wei nye bu ce mbir bali par bwalai?

³⁴ Dingin tono, n woo tum mbir banabindi yi nuwa bu pwiyanggi wa yi kulumba. Bu jiru wei bu kangga, bu piini bu kangga yeu, bu wacanu wei bu kangga a girindi kuru pero bu kekenu wei pma gwei yi gwei.

³⁵ Nuwa ninga mbiru wei bali dwii tiima nuwa bu ning pisu wu nya a gawuri Yamba bu nuwa

† **23:27 23:27** Nuwa bu Yudaya wa banni tone du populok a purongi a Wurcalima palaka rungguwa ba mwani ya ba ninga yaa walwal.

par siyei a sima, toso dwii tiima Abila nere wu ninga pisu wu nyaau bee bu Sakariya bol Berekaya wu bu jiyo cu du laa Yambau yi kwaare.

³⁶ N woo sagumbiru jire mwa mwa too yiringi julo wei dwii nuwa bu sinaa daandi wa.

³⁷ <<Aing! Wurcalima! Mba bu laci banabindi wa, pero bu bacanga nuwa bu Yamba tumuwe bonggo mbiru wa! Daa sono n kasi n kura mbira cika ku cwiyo kuran kwaraa ya miringgi kongondi yei, anda bu kwaanga!

³⁸ Suwa, nuwa duu mbiri laa mbiru koni!

³⁹ N woo sagumbiru, bu peri kogu mu, kopo nyangu ku bu ce min, <Wuure, a bonggo yo, wu bagu a miringgi din Mbaa Wu Gira!> >>

24

Somdi daandi su cwata gorai

¹ Yesu du laa Yambau, a mwatugu, kwatimba ya baanga bonggo you pma jukugu yo mweendi twii.

² A sa pma kin, <<Bu kogu tina yiringi mwa mwa, n sagumbiru jire Yaa sweli du nuwa duru wei a dwii bagon yo, kana dono nuwa kwiyanu wei.>>

³ Pu boo Yesu woo pisu dwii Cingu Souri Setun, kwatimba ya baanga bonggo you wulak pma ce kin, <<Sayiro, too yiri ningdu wei pene pero somdi bagu mai ca, yi daandi su cwata goroi?>>

⁴ Yesu nyii lee kin, <<Bu ruun tuwe kana we ba ciye mbiri ya.

⁵ Dingin nuwa tum baanga wei yi din mi, a cegu kin, <N yoogi Masiya,> pero pma ciyonu wei nuwa tum.

⁶ Ka bu nuu cewi kwai wundu wundu, anda bu nuu ya gwasi, tagi too yiringi ba ningi wa, anda boo nyanggu ku cwata gorou baa bu.

⁷ Sima wunmanu wei sima, lau wunmanu wei lau. June yari wei pero sima siktu wei buri pendi wundu wundu.

⁸ Too mwa mwa too toson taa kuulu.

⁹ <<Nuwa diinu wei nuwa ba pumbiri kuule, pero ba lacambira, bambam nuwa bu sima mwa mwa kwaambiri wei dingin mi.

¹⁰ A dwii jore nuwa tum yaranu wei miringgi leegu jirei, cuuru wei buri pmai pero kwaa wei buri.

¹¹ Pero banabindi leendi twiyongo wei tum, pero ciyonu wei nuwa tum.

¹² Tuwe cwatu wei buri dingin tono kangam nuwa tum ningi wei yutu.

¹³ Anda kana we wu boo gaanggu lam nyanggu ku pungu nyiinggu wei mirma.

¹⁴ Anda kopo ka nuwa wasir ciyei du teng du lau Yambau kana piyau a sima mwa mwa dingin nuwa mwa mwa ba nuwa, anda nyanggu cwata goro baa.

¹⁵ <<Ka bu kweyi yiringi pusi twii tu dee sentanggi, pitindi pu walwal a Laa Yambau cika tu banabi Daniel bala kin, yama kana we wu cegu dinaa ciyei ba kuranga too.

¹⁶ A dwii jore, yama pma bu miringgi Yudaya wa ba ceendo cingiri.

17 Kana we_wu dwii kani ba julo ya dinging ba dee kana ca a lai.

18 Kana we_wu woo_kondou ba waata ya lai degu gatangamau.

19 A kwii nyangu, nurumba bu yi rwiyyengi wa yi bu puugu nyii kwaraa wa, ningamanu wei pma yi buu.

20 Bu ce_kuru cuu mbiru ba yoo ya yi jundu kana nyangu Sabadu.

21 Dinging a dwii jore nuwa tii wei kuulu wang, wu boo nuwa tii bu tiigu yake toson taa simau kopo yoko, pero yaa ku perdu wei.

22 Ka na nuwa gwandila bu daandi swii ne yaa wu yilu wei, anda dinging pma bu Yamba seka wa, nuwa gwandila daandi swii.

23 A dwii jore kana we ka cee kin, <Ko, Masiya yo wuna!> kana ce kin, <Yo wii!> bu lee ya jire yi tono.

24 Dinging Masiya wu leendi yi banabindi leendi twiyongo wei, pero ninggu wei yiringi riyandi buri ba welenga kana bu nuwa Yamba seka pma wa, ka pma puu wei wai.

25 Bu suwa, n sambira kilang, boo jor ninga bu.

26 <<Dinging tono kana we_wu sambira kin, <Yo wii a gulai,> bu twiyoni ya, kana ce kin, <Yo wuna miringgi kani,> bu lee ya jire yi tono.

27 Dinging cika ku nyil gundu nyildi donome nuwa kwei nyambirangu, yito yi bagu Bol Nere.

28 Pu komdi soo miru, baperi kurani buri pwii.

29 <<Goro kuuli wu daandi swii, a kinangu, <Nyangu yo wei kumjila, pero pwalau na swiiri buri, bajwari yaranga wei diyau,

pero yiringi tu diyou saktu wei buri.>

30 <<A dwii jore somdi Bol Nere twii wei a diyou, pero mwa mwa duuri tu sima bwiyanu wei gaanggu, ka pma kwee wei Bol Nere bagu miringgu tinendi a diyou yi dimbire yi yilau wang.

31 Yo diinu wei nuwa ba wuu jume yi miu ba tummu wei bacamandi yei, kana piyau ba kuranga bu yo seka wa a miringgi kengandi nii su simai.

32 <<Yoko n kasi bu tilanga too yiri bonggo sou pwalgu. Ka bu kwee tosi bulugu, wandi yei tori bu soma min jundu ninga nem.

33 Yito mwaasi, ka bu kwee too yiringi mwa mwa, bu soma min a ninga nem, woo nyinou.

34 N woo sagumbiru jire nuwa bu sina daandi wa pma na bwaani kopo ka yiringi too mwa mwa ningdi buri.

35 Diyou yi sima woru wei anda ciyei mi yaa ku woru wei kana banyina.

Yaa wu som nyanggu yi jor yei.

36 <<Yaa wu som nyanggu kwii kana jor yei, kana bacamandi su diyou, kana Bwiya, buri Mbaate.

37 Cika ku ningi wa a daandi Nuhu, yito mwaasi nindu wei a jor bagu Bol Nere.

38 Cika ku ningi wa kamin daandi su jame dee, nuwa jegu yi naagu, nuwa ninggu laabwiya yi nyigu laabwiya kopo nyanggu ku Nuhu diiro konggoru.

39 Yaa ku pma som tu nindu wei, kopo ku jame baa dee pma. Yoo wei yito a jor du Bol Nere baa wei.

40 Nuwa kinggu wei nuwa rop kondou nuwa deru wei wiino, ba du wu wiino.

41 Nuwa nyinggu wei nurumba rop kogu yiri nii nuwa deru wei wiino ba du wu wiino.

42 <<Dingin tono, bu ninga pu swerigu dingin bu som bu nyangu ku Mbaa Wu Gira mbiri baa wei.

43 Anda n kasi bu kuranga min, ka nere wu laa wayau, na som jor du kuwe baa wei yi kume na sweru wei, yaa ku duru wei kuwe ba diiwe laa you.

44 Dingin tono bu siya cipigi buri, dingin Bol Nere baa wei a jor du bu yaa temandi.

45 <<Wii kewe yo we wu yi jire yi pwii, wu nere wu gira yo diin yo ba suwa kewaa bu laa you wa, ba nyii pma jeendi pmai cimacima a jor du daa yei?

46 Wuure bonggo woo nere, wu nere wu gira yo ka waatai ba kinggi wei a ninggu wurai yei cimacima.

47 N woo sagumbiru jire, yo cernu wei nere wii a dwii gina yo mwa mwa.

48 Ka cika kewe wii yi tuwe wei pero sar buri yei kin, <Nere wu gira mi daawe tum,>

49 pero tosi buwanggu kapima kewaa, pero yo wun jegu a naagu kem yi ba naamba nyinma.

50 Nere wu gira kewe wii waata wei a jor du nere wii teman bu, pero a jor du yo som bu,

51 baa puu wei kuule wang, ba neca yo yi nuwa bu yi batal wa, pu ji wei wiindi yi

dumonggu nyiyau.

25

Balangu ciyei a dwii bakorcanga kwap

¹ <<A dwii jore, lau diyou ningi wei cika bakorcanga kwap bu dee pitilari pmai aanda dingin ba terenga bwiyakaa wu laabwiya wa yo.

² Bu nuwo wa twii bacinba anda bu nuwo wa pwiyanggi.

³ Bacinba bwii dee pitilari pmai yaa nunggu.

⁴ Bu pwiyanggi bwii pma dee nunggu a pitilari pmai yi cweindi pmai.

⁵ Bwiyakaa wii siuwe yaa ku baa kilang, mwa mwa pmau toso jusonggu dimau.

⁶ <<Yi cudu kumdi, nuwa nuu duwai kin, <Bwiyakaa laabwiya yo wuna bu twiyongo bu de rau.>

⁷ <<Buri bakorcanga bwii wunongo, a menenga pitilari pmai.

⁸ Bacinba bwii sa bu pwiyanggi bwii kin, <Bu pu yir nunggu mbiru pitilari yiri a bwangu.>

⁹ <<Pma nyii lee kin, <Ang ang yaa ku yiri yiri wei kem yi mbaa, kujang bu ambira bu tenmanuwe buri mbiri bonggo nuwa bu cuugu wa.>

¹⁰ <<Anda pu pma mwatanga tenggu nunggu, bwiyakaa laabwiya lamuwe. Bakorcanga bu cipigi buri wa bwii de rau kem yi yo a waandi laabwiya. Pero nuwa laka nyinou.

¹¹ Gorou you, bu kangga bwii baanga, pma ce kin, <Nere wu gira, Nere wu gira, wun yiri nyinou!>

12 <<A nyii lee kin, <N woo sagumbiru jire n sommbiru bu.>

13 <<Dingin tono bu cipa buri, dingin bu som bu nyanggi yei kana jor yei.

Balanggu ciyei a dwii kewaa kunong

14 <<Bambang, cika nere wu kangge wu ninggu songmau, a yiwe kewaa ya nyii pma gina yo ba suwa yi tono.

15 Wu wiino a nyii ken talenti nuwo, wu kangge talenti rop, pero wu kangge talenti wiino, kana wono cuunggi dimbir yo, a ninga songma ya.*

16 Nere wu nuwa nyii talenti nuwo, a mwati yoko yoko a ninga duu yi tono a nyingga cwata talenti nuwo wu kangge.

17 Yito mwaasi, wu nuwa nyii talenti rop a nyingga cwata talenti rop wu kangge.

18 Anda wu nuwa nyii talenti wiino wii a mwati wul bou a sima ting ken nere wu gira yo.

19 <<Goro daandi tum nere wu gira kewaa bwii waata buri songma ya a kasa ba suwa gina yo wu bonggo kewaa ya.

20 Nere wu nuwa nyii talenti nuwo a dee talenti wu kangge a nuwo a ce kin, <Nere wu gira, ma nyiingge talenti nuwo ko, n nyingga cwata wu kangge nuwo.>

21 <<Nere wu gira yo see kin, <Wusa, ma yoogi kewe wu nyaa wu yi jirei! Ma ninga jirei dwii yiringi banyina, n diiminu wei sugu yiringi tu

* 25:15 25:15 Talenti wiino tum you lam ken wurai neri nyan mila kuna rop a dwii jore

tum. Bame ma ninga buri degdeg kem yi nere wu gira mo!>

22 <<Nere wu talenti rop wii mwaasi a baa a ce kin, <Nere wu gira ma nyiingge talenti rop n nyingga cwata talenti rop.>

23 <<Nere wu gira yo nyii lee kin, <Wusa, ma yoogi kewe wu nyaa wu yi jirei! Ma ninga jirei dwii yiringi banyina, n diiminu wei sugu yiringi tu tum. Bame ma ninga buri degdeg kem yi nere wu gira mo!>

24 <<Bur nere wu yi talenti wiino wii baa, a ce kin, <Nere wu gira n soma ma yoogi duu nere ku ningandi yei yi buu, ma kaci pu ma pi bu, pero ma kurani pu ma wasi bu goma.>

25 Dingin tono n nuu gwasi, n mwatingge, n tuko talenti mo miringgi sima. Ko! Yiri mai yo tina.>

26 <<Nere wu gira yo nyii lee kin, <Mo, kewe wu yi tuwe yi kuule! Ma soma min n kaci pu n pi bu pero n kurani pu n wasi bu goma?

27 Na ninga kundi, na ma ruu ken mi a betal kene, palaka ka n waata buri n nyingga a cwata buri.

28 Bu yi talenti woo bonggo you bu nyii wu yi talenti kwap.

29 Dingin kana we wu woo yi tono nuwa cwatamanu wei yo, ba ninga tum. Kana we wu yaa tono kana tu yi tonoi nuwa yiyamanu wei yo.

30 Bu manni woo kewe wu bwii woo twalange, miringgi kume, pu ninga wei pu windi yi dumonggu nyiyau.>

Nyanggu balu

31 <<A jor du Bol Nere baa wej yi yilau you, kem yi bacamandi yei mwa mwa, yo sinu wej candu lau you wu yi yilau.

32 Nuwa bu sima mwa mwa kuranu wej buri gawuri yei, yo kenu wej nuwa wundu wundu, cika ku taage kari puuri bonggo kwamali.

33 Yo ruu wej puuri a wai you wu jeu, kwamali a wai you wu miu.

34 <<A dwii jore Balaa wii sar wej pma bu wai you wu jeu kin, <Bambe, mba bu yi wuuri wa bonggo Mbaa mi, bu je lau ku nuwa ruwo dingin mba yake taawu sima.

35 Dingen n nuu june bu nyiinggi jeendi, n nuu jii bu punggu gundu, n yoo rungge bu julunggi bu,

36 n yaa see bu paringin see, n yaa cingcing bu suwangge, n woo jarum bu kacangguwe.>

37 <<Nuwa bu ning pisu wu nyaa wa bwii lee wej kin, <Mbaa Wu Gira, yi ko mina pene yi june yi jee mina, yi jii yi puu min gundu ma naa?

38 Yi ko mina pene ma rungge, yi yi mina, pero ma yaa see, yi pari min see?

39 Yi ko mina pene yaa cingcing kana a jarum yi kaca mina?>

40 <<Balaa wii nyii wej lee kin, <N woo sagumbiru jire, kana ca tu bu ningaman wu wiino wu banyina a cudu ciyamba muwa bina, bu ningangina.>

41 <<Pero sa ru wej pma bu wai you wu miu kin, <Bu lamanga poo bonggo mu, mba bu sentanggi wa, bu tembiro bwalau ku yaa

dumdu, ku nuwa menenga dingin balaa buwai wa kem yi bacamandi yei.

⁴² Dingin n nuu june yaa ku bu nyiinggi jeendi, n nuu jii yaa ku bu punggu gundu.

⁴³ N rungge yaa ku bu julungge, n yaa see yaa ku bu paringin see, n yaa cingcing pero n woo jarum yaa ku bu suwangge.>

⁴⁴ <<Pma mwaasi nyii wei lee kin, <Mbaa Wu Gira, yi ko mina pene yi june, yi jii, ma rungge, ma yaa see, ma yaa cingcing pero ma jarum anda yi kala min bu?>

⁴⁵ <<Yo nyii wei lee kin, <N woo sagumbiru jire, kana ca tu bu ningaman bu wu wiino wu banyina a cudu pmai, bu ningangin bu.>

⁴⁶ <<Nuwa bwii teendu wei kuule wu yaa matigu anda nuwa bu ning pisu wu nyaau a gawuri Yamba wa, aandi wei pu yi piima bu yaa matigu wa.>>

26

Bagiraa ciiman Yesu tandau

¹ Pu Yesu mata cegu too yiringi mwa mwa, a sa kwatimba ya kin,

² <<Bu soma min Waandi Yerigu a du daa rop, nuwa nyii wei Bol Nere nuwa ba piina yeu.>>

³ A dwii jore bagiraa kuruwa yi bagiraa nuwa wa, pma kuranga buri caame bagira kuruwa, wu dini yei Kayapa,

⁴ pma cipa buri dingin ba taa Yesu tukugi ba ji yo.

⁵ Anda pma ce kin, <<Yaa jor Waandi Yerigi, daakal nuwa ba wun kwai.>>

Nur parman Yesu nunggu a Betani

⁶ Pu Yesu woo Betani a miringgi laa Simon wu woo yi butangi nang,

⁷ nure wu kangge baa yi kukulo* wu yi nunggu ku yi pircu wang ku run teng, a parman yo dwii pu woo jegu jeendi.

⁸ Pu kwatimba ya ko too yito, pma bwiyanga gaanggu, pma ce kin, <<Woo kwala yo ca?

⁹ Nunggu koo nuwa na cuu yo yi ken tum ba nyii bakuuluwa.>>

¹⁰ Yesu som tu pma cegu, a sa pma kin, <<Dingin ca bu doma yi nure woo a dwii yiri tu nyaayi tu ninganginai?

¹¹ Bu boo yi bakuuluwa kem yi mba kana pene, anda yaa ku n sii wei kem yi mba kana pene.

¹² Paringgu nunggu ku run teng ku paringina buri koo, a cipigu mu bonggo boore.

¹³ N woo sagumbiru jire, kana piyau pu nuwa wasiru wei ciyei du teng dina a sima mwa mwa, nuwa ce wei tu ningai dingin danggigu yi yo.>>

Yahuda lee ba cuu Yesu

¹⁴ A dwii jore wu wiino cuu bu kwatimba ya bu kwap sur rop bwii, wu dini yei Yahuda Iskariyoti a aara bonggo bagiraa kuruwa wa,

¹⁵ a sa pma kin, <<Tu bu nyiingu wei ca ka n din yo war mbiri?>> Pma ce ken asurpa kuna kunong nyii yo.

¹⁶ Yake doo jore, Yahuda kasa nyindi su yo cuuru wei yo.

* **26:7 26:7** Kukulo wii nuwa meneni yi swei du yi yilau, du nuwa yiri kin alabasta.

Yesu je jeendi Waandi Yerigi kem yi kwatimba ya

17 A nyanggu ku gawuriyo a Waandi Burodi wu yaa Yisti, kwatimba Yesu wa baanga pira kin, <<Ma kasi yi menenga jeendi Waandi Yerigi piyau dingin mo?>>

18 A nyii lee kin, <<Bu ambira gwei bonggo nere wu kangge bu see min, <Kulum ce kin: Jor mi ninga nem. N je wei Waandi Yerigi kem yi kwatimba mu wa a laa mau.>>

19 Kwatimba ya bwii ninga cika ku Yesu sa pma ba ninga, pma menenga Waandi Yerigi.

20 Pu nyambiranggu ninga, Yesu si siyau aari jegu jeendi kem yi kwatimba ya kwap sur rop.

21 Pu pma boo jegu jeendi, a ce kin, <<N woo sagumbiru jire, wu wiino cudu mbiri cuunggu wei.>>

22 Pma bwiyinga gaunggu, pma toso sagu yo wiino, wiino kin, <<Mbaa Wu Gira, wii mi ne?>>

23 Yesu nyii lee kin, <<Wu diini wai you miringgi panane kem yi mi cuunggu wei.

24 Bol Nere bwaaru wei cika ku balgi a dwii yei, anda too yiri bunam bonggo nere wu cuu Bol Nere, kujang ku nuwa na bi bu yo.>>

25 Yahuda wu yo cuuru wei yo a ce kin, <<Kulume, wii mi ru?>> Yesu nyii lee kin, <<Ong ma ce.>>

26 Pu pma boo jegu jeendi, Yesu dee kumaa, a wananga Yamba, a gelenga, a nyii kwatimba ya, a ce kin, <<Bu yiya bu jee, too buri mi.>>

27 Pero a dee bosoro gundu inabi, a wananga Yamba, a nyii pma, a ce kin, <<Mwa mwa bu naa miri.

28 Too tiima muwa, bu twanga tu Yamba kwee yi nuwa ya, bu pardu wei siyei buri dingin pargu sukum welemdi nuwa tum.

29 N woo sagumbiru, yaa ku n peru wei naagu gundu inabi kopo kwii nyangu ku n naa wei ku pucu kem yi mba a Lau Mbaa mu.>>

30 Goro pu pma pii pii pma mwatanga Cingu Souri Setun.

Yesu ce kin Bitrus gwelu wei yo

31 Goro yito Yesu sa pma kin, <<Yi kum wunaa mwa mwa mbiru bu nyingu wei gorou, dingin balgi miringgi lakargar Yamba kin, <N buu wei taage, n jiyo, kan puuri weenu wei.

32 Anda goro pu n wuni n cwii wei gawur mbiri n anggi Galili.>>

33 Bitrus nyii lee kin, <<Kana, kana we waatu wei buri yi gorou dingin mo, mi yaa ku n waatu wei.>>

34 Yesu see kin, <<Bitrus, n woo sagumou jire, a kum wunaa kamin koloo ba tee teere ma gwelenggu wei daa kunong.>>

35 Anda Bitrus ce kin, <<Kana n booru wei kem yi mo, yaa ku n gweleminu wei.>> Pero mwa mwa kwatimba ya bu kangga bwii mwaasi ce yito.

Yesu ce kuru yi kwatimba ya a Gesimani

36 Goro yito Yesu mwati kem yi kwatimba ya a pu nuwa yiri kin, Gesimani, a sa pma kin, <<Bu sindi siyei pina mi n ko n songge gawure n ce kuru.>>

37 A dee Bitrus yi kwaraa Sabadi bu rop kem yi yo, a toso bwiyang gaanggu yi miyanggu buru.

38 A sa pma kin, <<Bawei mi twangi yi bwiyang gaanggu cika n bwaa. Bu sindi siyandi pina bu siya cipigi buri kem yi mi.>>

39 A kosuro banyina a yara, a suni kau sima, a ce kuru kin, <<Mbaa mi, ka nindu wai wei mo demangin kina cusugu. Anda dangandi mi ne, anda too mai.>>

40 A waata bonggo kwatimba ya baa nyingga pma diimandi, a pira Bitrus kin, <<Yaa ku bu puu wei bu siya cipigi buri kem yi mi nyan jor banyina ru?

41 Bu siya cipigi buri, bu ce kuru daakal bu yanna miyam. Bawei kasigu anda buri yaa dimbire.>>

42 A mwati ku rop a ce kuru kin, <<Mbaa mi, ka yaa ku nindu wei koo cusugu ba lamana kopo ka n cusi, yama dangandi mai ba ningwa.>>

43 Pu waatau a nyingga pma diimandi dong, dingin nundi pma ninga kombirom.

44 A du pma a waata buri dong, a ce kuru ku kunong a pero tu conggo ciyei.

45 Pero a waata buri bonggo kwatimba ya a sa pma kin, <<Boo bu boo diimandi ru? Bu yoronggu ru? Suwa jor ninga nuwa cuu Bol Nere a war nuwa bu yi welemdi wa.

46 Bu wunongo yi mwatanga! Nere wu cuugu mu wii woo bagu!>>

Nuwa ta Yesu

47 Pu boo Yesu woo cegu ciyeu, Yahuda wu wiino cudu bu kwap sur rop bwii lamuwe kem

yi_nuwa tum yi_dompouri yi_gumongi, bu bagiraa kuruwa wa yi_bagiraa nuwa wa tumuwe.

⁴⁸ Yo_wu nere_wu cuuru wei_a ru somdi tu pma kuranu wei_kin, <<Nere_wu kuuna buri_wii yo, bu tee.>>

⁴⁹ Ku pma lama, yoko_yoko_Yahuda aara bonggo Yesu see_kin, <<N ci mina kulume,>> pero a kuunu_yo_buri.

⁵⁰ Yesu nyii_lee_kin, <<Basin mi, ninga tu demuwe.>>

Nuwa bwii twiyongo parnu_wari_taa Yesu.

⁵¹ Ku ningwa yito, wu wiino cudu_barauwa Yesu a yaku wai a podo dompou_you_a kaca twiyau kewe_bagira kuruwa a mwariya.

⁵² Yesu se_kin, <<Pun dompou_mou miringgi laa_you, dingin_wu podo dompou_boori_dompou.

⁵³ Ma nuu_min n pu yigu_Mbaa mi, ba suka bacamandi tum_yoko_kina ru?

⁵⁴ Anda ka n ning_yito, ciyei_Demteere du ce_kin, tagi_ba ningwa_yito, nindu_wei_nye_ba twangwa?>>

⁵⁵ A dwii jore_Yesu sa nuwa bu tum bwii_kin, <<Dingin_ca bu baanga yi_dompouri yi_gumongi bu tangge_cika n kuwe? Kana kono_nyanggu n sii_laa Yambau_n pirgu_yiri_nuwa anda bu tanggu bu.

⁵⁶ Anda too_mwa mwa a ningwa palaka ba twanga tu banabindi_bala_kin nindu_wei.>> Kwatimba ya mwa mwa du_yo_a ceendo.

Yesu gawur bagiraa nuwa bu Yudaya wa

57 Nuwa bu ta Yesu wa a dee yo bonggo Kayapa kuru wu gira pu kulumba teeringi wa yi bagiraa Yudaya wa kuranga buri.

58 Anda Bitrus pong yo gantin, a lama bonggo laa kuru wu gira . A diiro sin siyei kem yi nuwa bu swerigu yo wa ba ko tu nindu wei buri.

59 Bagira kuruwa yi bagiraa nuwa bu Yudaya wa mwa mwa pma kasigu seedaki leendu a dwii Yesu palaka pma ba ji yo.

60 Anda pma nyingga bu kana ca, kana ku baleenda twiyongo.

Cwata goro you nuwa rop twiyongo,

61 a ce kin, <<Nere woo ce kin, <N puu wei bwiyanggu laa Yambau n mwe nyan daa kunong.>>>

62 Bur bagira kuruwa wii wuni a sa Yesu kin, <<Yaa ku ma nyii wei lee a dwii weleceu wu nuwa boo cegu a dwii ru?>>

63 Yesu sin siyei tok.

Bagira kuruwa wii sa yo kin, <<N neca mina yi Yamba wii yi piima yi wera sa yiro ka ma Masiya Bol Yamba wai.>>

64 Yesu nyii lee kin, <<Ong cika ku ma ce koo, anda n woo sagumbiru pina yi gawure bu kwee wei Bol Nere pisu a wai wu jeu Yambau wu yi Dimbire a bagu miringgu tinendi a diyou.>>

65 Bagira kuruwa wii pwaranga see yo dingin ba juku bwiyan gaanggu you, a ce kin, <<A ce cewi bwiyangi din Yambai! Dingin ca yi kasigu seedaki wu kangge dong? Suwa, yoko bu nuu koo bwiyanu din Yambau.

66 Bu ce min ca? Pma leeman yo kin, <<A yinno boore!>>

67 Bur pma tuuman yo tiima kau, pero cumongo. Bu kangga kapanga yo.

68 A ce kin, <<Masiya, ka ma banabi wai, sa yiro, wu buu mina we?>>

Bitrus gwela Yesu

69 Bitrus woo piisu miringgi laa kuru wu bagira, bur bweecanga wu kangge wu twii kewe baa bonggo yo ce kin, <<Mo mwaasi ma woo kem yi Yesu nere wu Galili.>>

70 Anda a gwela yo a gawuru pmai mwa mwa kin, <<N som bu tu ma cegi.>>

71 Pu twiyo nyinou, bweecanga wu kangge wu twii kewe ko yo, a sa nuwa bu pwii bwii kin, <<Wuna nere woo kem yi Yesu wu Nasaret.>>

72 A gwela dong, a werenga ce kin, <<N som bu woo nere.>>

73 Gorou banyina pma bu pitindi pwii bwii aanda bonggo Bitrus a ce kin, <<Manggu, ma woo cudu pmai, dingin miu ce mou a jukuya.>>

74 A toso werenggu kin, <<Bwiige ba tangge ka n cegu leendi wai, n som bu nere woo.>>

Kinongu koloo tee teere.

75 Bitrus dangga tu Yesu sa yo, <<Kamin koloo ba tee teere, ma gwelenggu wei daa kunong min ma songgu bu.>> A twiyo twalange, a ji windi wang.

1 Yi pinu kilang, bagiraa kuruwa yi bagiraa nuwa wa mwa mwa pma suwa tu pma ningu wej ba ji Yesu.

2 Pma twala yo, mwatanga yi yo de bonggo Bilatus wu twii gomna.

3 Pu Yahuda wu cuu yo ko nuwa mwar man Yesu bali boori. A ninga mondo mondo, a puu ken asurpa kuna kunong dwii bagiraa kuruwa wa wii yi bagiraa nuwa bwii.

4 A ce kin, <<N ninga welem, n cuu nere wu yaa weleceu.>>

Pma ce kin, Do yiri dono, too biiki mo.>>

5 Yahuda para ken dwii miringgi laa Yambau, a mwati yaka buri yei.

6 Bagiraa kuruwa wa wii dee ken dwii a ce kin, <Teeri lee bu nuwa ba parni doo ken a betal, dingin too ken tiimai.>>

7 Pma lee ba dee ken dwii ba ten sima nere wu mweeni dinendi, dingin ba yo pu nuwa ting runguwa.

8 Twii tonu nuwa yiri kin, Sima Tiima wa lama yoko.

9 Too twang tu banabi Irmiya cei, <<Pma dee asurpa kuna kunong, too duu wu nuwa bu Israila wa ru woo kin nuwa ba cuu yo.

10 Pma dee ten sima nere wu mweeni dinendi cika ku Mbaa Wu Gira sangge.>>

Bilatus ningaman Yesu bali

11 Yesu tin tiyei gawur gomna, gomna pira kin, <<Ma yoogi balaa wu Yudaya ru?>>

A lee kin, <<Ong cika ku ma ce koo.>>

12 Pu bagiraa kuruwa wa yi bagiraa nuwa wa ce welemdi a dwii yei, yaa ku nyii lee.

13 Bilatus pira kin, <<Ma yaa nuugu seedaki wu pma cegu dwii ma ru?>>

14 Anda Yesu yaa ku sa pma ciyei, a dwii cewi tu pma ce dwii yei kana banyina, gomna riyanga buri wang.

15 Cika ku gomna mee ningu, kana sono Waandi Yerigu yo man nere wiino wu jarum wu nuwa kasa.

16 A dwii jore woo nere wu jarum wu nuwa soma wang yi ninga wu bwiiye, dini yei Barabas.

17 Dingin tono pu nuwa kuranga buri, Bilatus pira pma kin, <<Wu bu kasi n man mbira we Barabas ru, Yesu wu nuwa yiri kin Masiya ru?>>

18 Dingin a soma kin pma taa Yesu bonggo you dingin bwii.

19 Pu Bilatus woo pisu a pisu wu yo ning balu, nure yo ninga man yo tune kin, <<Ma ningamani ya nere wu yaa weleceu woo kana ca dingin reni n turuwa yi dweendi dingin yo.>>

20 Anda kuruwa bu bagiraa wa yi bagiraa nuwa wa pma ciyongo nuwa ba ce kin nuwa ba man Barabas, nuwa ba ji Yesu.

21 Gomna pira kin, <<Cuđu pmai bu rop, n man mbuwe we?

Pma nyii lee kin, <<Barabas.>>

22 Bilatus pira pma kin, <<N ning ca yi Yesu wu nuwa yiri kin Masiya?>>

Mwa mwa pma nyii lee kin, <<Piina yeu ba bwaa.>>

23 Bilatus pira kin, <<Dingin ca? A ninga weleceu you ca?>>

Anda nuwa bwii cwata kwarindi kin, <<Bu piina yeu!>>

²⁴ Pu Bilatus ko yaa tu yo puu wei, anda pma toso kasigu ruuni, dingin tono a dee gundu a car wari yei gawur nuwa bwii a ce kin, <<N yaa wai dwii boore nere woo, yama tiima you ba siya dwii mbiri!>>

²⁵ Nuwa bwii mwa mwa lee kin, <<Yama tiima ya ba siya dwii yiri yi kwaraa yuwa!>>

²⁶ A man manuwe pma Barabas, a din nuwa waci Yesu, a nyii Yesu kacara bu Roma wa ba piina yeu.

Kacara ninga man Yesu nyasi

²⁷ Kacara Bilatus de Yesu miringgi caame gomna, pma yiwe kacara mwa mwa kuranga buri bonggo you.

²⁸ Pma wuroman yo see a teeman yo gatangamau ku wucici cika balaa,

²⁹ pma menenga metuwal turi a diiman yo dwii. Pma dee jwalu nyiia a wai wu jeu, pma kun kwiyei gawur yei, pma ningaman yo nyasi cegu kin, <<Bundi, balaa wu Yudaya>>

³⁰ Pma tuuman yo tiima, pero pma dee jwalu ku wai yo kwii a ninga pu buwanggu dwii.

³¹ Goro pu pma mata ninga man yo nyasi, pma teeman yo see yo, pma de yo ba piina yeu.

Piinggu Yesu yeu

³² Pu pma twiyonggu, pma kaanga yi nere wu kangge wu gwei Sayirin din yei Simon. Kacara bwii kicanga ba de yeu wii.

³³ Pma baanga pu nuwa yiri kin, Golgota, pitindi yei kin, <<Koko Dwii.>>

34 Pma nyii Yesu gundu inabi casinggi tu kwerek ba naa, anda goro pu tiyau, a kwaa naagu.

35 Pu pma piina yeu, pma cwaanga see yo bonggo keegu latombale.

36 Pma sin siyendi, ninga pu swerigu yo.

37 Nuwa bala weleceu you a piina dwii yeu wii nem yi dwii yei kin, <<Wunaa Yesu, balaa nuwa bu Yudaya wa.>>

38 Nuwa piini kuuwa rop kem yi yo wu wiino wai you jeu, wu kangge wai wu miu.

39 Nuwa bu cwiyonu wa ninga pu rweenggu a gepugu dwii a ninggu yo nyasi,

40 cegu kin, <<Ma ce min ma repu wei Laa Yambau ma moru wei nyan daa kunong, mira buri mai, ma julo yeu woo, ka ma Bol Yamba wai!>>

41 Yito mwaasi yi bagiraa kuruwa wa yi kulumba teeringi wa yi bagiraa nuwa wa pma ninga man yo nyasi.

42 Pma cegu kin, <<Yo mira bu kangga anda jaanga mirigu buri yei! Balaa wu Israila! Yama ba julo dwii yeu woo, yo mwa yi lee wei jire yi yo.

43 Yo lee jire yi Yamba. Yama Yamba ba mira yo ka kasi yo wei, dingin a ce kin, <Yo Bol Yamba>>>

44 Ban kuuwa bu nuwa piina yeu kem yi yo wa rweenga yo mwaasi.

Boori Yesu

45 Yake cudu nyanggi, kumjila laka sima bwii mwa mwa kopo yi nyambiranggu jor du kunong.

46 A jor du kunong Yesu yi yire yi duwei kin, <<Eloi, Eloi, lama sabaktani?>> Pitindi yei kin, <<Yamba mi, Yamba mi, dingin ca ma manggi siyei?>>

47 Pu pma bu pitindi pwii wa nuwa yito pma ce kin, <<A yigu Iliya.>>

48 Kinongu wu kangge ceero a diini soso gundu inabi ku jomburom a diina jwalu a diiman Yesu nyiyau ba naa.

49 Bu kangga bwii ce kin, <<Bu dwiya poo yi ko ka yikwii Iliya ba mira wei yo wai.>>

50 Pu Yesu pero yigu yiru yi duwai, piima ya twiyo.

51 A dwii jore kowe wu laa Yambau ngerenga buri rop toso diyou bee sima. Sima sikto buri swaringi gelenga buri.

52 Purongi wumongo buri nuwa bu walwal bu bwaanga wa wunongo yi piima.

53 Pma twiyongo a purongi goro wungu Yesu boore, pma mwatanga gwei du walwal, pma juku buri pmai nuwa tum.

54 Pu bagira kacara yi pma bu kem swerigu Yesu wa ko sima sikto buri yi mwa mwa tu ningi wa, pma nuu gwasi wang, pma ce kin, <<Manggu too Bol Yamba!>>

55 Nurumba tum boo pwii pma sugu kwaara. Pma pong Yesu yake Galili pma kalanggu yo wurai.

56 A cudu bu boo pwii wa, boo yi bu Maryamu wu Magadaliya yi Maryamu njaa Yakubu yi Yusupu yi njaa kwaraa Sabadi wa.

Tinggu Yesu

57 Pu nyambiranggu ninga nem, bagina wu kangge wu gwei Arimatiya a baa, din yei Yusupu, yo yiri yei woo cudu kwatimba Yesu wa.

58 A aara bonggo Bilatus, a sengo komou Yesu, Bilatus sa nuwa ba nyiia.

59 Yusupu diin nuwa cikumanuwe yo buri Yesu a yeu, a kumbulo yi lawan wu walwal.

60 A diin yo a puri yei du puci du wuli dwii sweli. A cenni sweli du duwi nyan puri dwii a mwati.

61 Maryamu Magadaliya yi Maryamu wu kangge wii pma pisindi puri dwii.

Nuwa bu swerigu puri Yesu wa

62 Ku lam pinu nyanggu sabadu, bagiraa kuruwa wa yi Parisayo aanda bonggo Bilatus.

63 Pma ce kin, <<Nere wu gira, yi dangga tu nere wu ciyeni nuwa woo ce pu boo woo yo piima kin, <Goro daa kunong n wuni wei yi piima dong.>>

64 Dingin tono diin nuwa ba swera puri dwii nyan daa kunong, dakali, kwatimba ya ba jinda buri yei, ba sa nuwa kin a wuni bonggo boore. Ka ningdi yito ciyeni tu goro yo gwalu wei tu gawuriyo.>>

65 Bilatus nyii lee kin, <<Bu dee kacara bu sweru wei wa bu ambira puri dwii bu swera nyan dimbiri mbire.>>

66 Pma aanda puri dwii, pma dii mwalinggi dwii sweli dwii, diini kacara ba swera.

28

Wunggu Yesu boore

¹ Goro nyanggu Sabadu yi pin kilang a nyanggu Laadi, Maryamu wu gwei Magadaliya yi Maryamu wu kangge wii pma mwatanga ba suwa puri dwii.

² Sima sikto buri wang, dingin bacama Mbaa Wu Gira a julo diyoo Yambau, a aara puri dwii, a gumbulo swei dwii a siina dwii yei.

³ A nyilanggu, see yo populok cika cankar.

⁴ Nuwa bu swerigu wa pma nuu gwasi yei pma remcuwa yaranga cika nuwa bu bwaanggi wa.

⁵ Bacama wii sa nurumba wii kin, <<Bu nuu ya gwasi, dingin n soma bu kasigu Yesu wu nuwa piina yeu.

⁶ Yaa poo, a wuni cika ku ceu, bambe bu ko pu nuwa kendau.

⁷ Bu ambira kilang kilang bu sa kwatimba ya, <A wuni bonggo boore, anda woo songma Galili a gawur mbiri. Bu kwee wei yo pwii.> Yoko n sambira.>>

⁸ Dingin tono nurumba bwii yala buri du puri dwii yi gwasi, yi buri degdeg, pma ceendo ba sa kwatimba ya.

⁹ Kinangu kwii Yesu baa bonggo pmau ce kin, <<N cigu mbiru.>> Pma baanga bonggo you kwiino mwar yei a kuraman yo sima.

¹⁰ Yesu sa pma kin, <<Bu nuu ya gwasi, bu ambira bu sa ciyamba muwa ba aanda Galili, pma konggu wei pwii.>>

Ciyei du nuwa bu swerigu puri Yesu dee

¹¹ Pu nurumba bwii boo nyinou, bu kangga cudu nuwa bu swerigu puri Yesu wa mwatanga

miringgu gwei a sa bagiraa kuruwa wa kana ca tu ningwa.

¹² Pu bagiraa kuruwa wa kaanga yi bagiraa nuwa wa, pma sedo pwii, pma nyii kacaara bwii ken tum.

¹³ Pma ba sa pma kin, <<Bu sa nuwa min, <Kwatimba ya baanga yi kume ba jinda yo pu yi boo diimandu.>>>

¹⁴ Ka doo ciyei lam bonggo gomna, yo nyan dwii yiri yi diramanu wei yo gaangu pero yi yiki mbiri wei a kuule.>>

¹⁵ Dingin tono pma dee ken dwii ninga tu nuwa sa pmai. Woo labar wasi buri kwaara bonggo nuwa bu Yudaya wa a baa kina nyangu.

Teeri du girai

¹⁶ Kwatimba ya bu kwap sur wiino bwii a aanda Galili, a cingu ku Yesu sa pmau.

¹⁷ Pu ko yo, pma kuraman yo sima anda bu kangga lee bu kin wii Yesu.

¹⁸ Yesu baa bonggo pmau a ce kin, <<Mwa mwa dimbire wu diyou yi sima nuwa nyingge

¹⁹ Dingin tono bu ambira a kana piyau miringgi sima bu yiwe nuwa mwa mwa ba yoo kwatimba muwa, bu ningaman pma batisima miringgi din Mbaate yi du Bwiya yi du Bawei du Walwal.

²⁰ Bu pir pma ba ninga pongondi yi kana ca tu n sa mbirai. Jire, n woo kem yi mba kana pene pene, kopo nyangu gwatugu simai.>>

Waja **Part of the New Testament in the Waja language of** **Nigerea**

copyright © 2024 The Seed Company in collaboration with Language Developers and Bible Translators Association

Language: (Waja)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 12 Jun 2026 from source files dated 9 Jul 2025

bc61fc0a-b349-5328-9699-9f7ae5bceaa7